



明會要卷三十九

永新龍

職官十一

鴻臚寺

元侍儀司
隸禮部

國文彬
書錄
唐鑑錄
唐史彙

書錄

吳元年置侍儀司洪武四年定侍儀使引進使九年改爲殿廷儀禮司設使副承奉鳴贊序班十三年改使爲司正分左右司副各一人革承奉增設司儀四人二十二年增設左右司丞四人三十年正月己卯改爲鴻臚寺以儀禮司正房顯爲卿正四品給事中仲牧劉繼宗爲少卿從五品翰林院典籍馬定爲司丞從六品又設外夷通事隸焉

明會要卷三十九

建文中以行人隸鴻臚寺成祖復舊制

職官志
夢餘錄

洪武六年九月丙午諭自今凡新任官及諸武臣於禮儀有不嫻習者令侍儀司官日於午門外演習之

大訓
記

永樂元年引禮舍人楊善改鴻臚寺序班善偉風儀音吐洪亮工進止每朝謁引見奏時上目屬之累進右寺丞仁宗卽位擢本寺卿正統中擢禮部侍郎進右都御史仍視

鴻臚如故

楊善
傳

仁宗初諭鴻臚寺卿楊善等曰朕初卽位凡吏治賢否民情休戚皆欲聞之而四方遠者無由盡達自今方岳大臣來朝卽皆引見朕親問之庶幾可悉下情

洪熙元年諭鴻臚寺曰故事視朝後諸司有急切機務不得面陳者許具題本於宮門投進今訴私事勾私恩者亦進題本壞法亂政弊莫甚焉今後惟警急機務許進題本其餘並令公朝陳奏違者論罪

已上大訓記

隆慶元年議准鴻臚寺別途出身者官至左少卿而止三六九年考滿止許加俸不許升卿

萬曆六年令鴻臚寺卿缺仍於本寺少卿年久練熟者推

補不必另選

已上會典

尚寶司

元典瑞院

太祖初設符璽郎吳元年十二月改尚寶司卿正五品少

明實錄卷三十九

二

卿從五品尚寶司列署右掖之內初以侍從儒臣勳衛領之如耿瑄以散騎舍人黃觀以侍中楊榮以庶子爲卿非有才能不得調勳衛子弟奉旨乃得補丞其後多以恩廕寄祿無常員

職官志王圻通考

明之各寶皆內宮尚寶監女官掌之遇用寶則尚寶司以揭帖赴尚寶監請旨然後赴內司領取歲用寶三萬餘顆歲終尚寶司奏進數目

百官入朝佩牙牌鐫官職於牌上拜官則於尚寶領出出

京及遷轉則繳還

已上夢餘錄

永樂十一年征衛拉特太孫侍行帝命楊榮以閒陳說經

史兼領尙寶事

楊榮傳

嘉靖二十二年嚴嵩欲以子世蕃爲尙寶司丞文選郎鄭曉曰治中遷知府例也遷尙寶無故事嵩怒貶曉和州同知世蕃尋遷尙寶司少卿

鄭曉傳

中書舍人

元中書省有直省舍人隸客省使

明初設立相國平章左右丞參政卽古宰相之職故置左右司郎中都事等官爲之屬至洪武十三年革丞相餘官皆革後設殿閣大學士備顧問並不預政故不置屬景順以後機務繁重而內閣制誥兩中書舍人以書辦供事朝夕卽古之宰相屬也選用或由進士或由舉人監生儒士

明史卷三十九

三

以纂修效勞者亦得入殆稱清華之秩矣

王圻通考

洪武七年設直省舍人隸中書省九年爲中書舍人正七

品

職官志

以翰林編修朱孟辨工部照磨盧熊吏部奏差史

靖可爲之三人俱以博學能書稱故有是命

昭代典則

十年與

給事中並隸承敕監

職官志

十三年革中書省以省中節目

寄之舍人故稱科而無堂官

王圻通考

建文改爲侍書入文翰

館成祖復舊制尋設中書科署於午門外定設中書舍人

二十人

職官志

初置省舍人後革省爲科定中書舍人每大朝會則擬四員與翰林史官上殿東西班對立凡東宮節令朝賀定擬

二員文華殿導駕侍班凡會試一員入場收掌試卷日給大官酒饌與翰林宮坊尙寶司六科同爲侍從之臣其選用自進士外舉人與纂修書成被恩典者乃得之監生生儒惟勳臣暨宮僚講官子孫承廕奉特旨者乃得之至文華殿門東房別設中書舍人專奉旨書寫書籍等項武英殿門西房別設中書舍人專奉旨寫篆冊寶圖書等項內閣誥敕制敕二房中書不屬中書科

春明夢餘錄

永樂初命選翰林文學之臣入直文淵閣參典機務詔冊制誥皆屬之而謄副繕正皆中書舍人分直更入事竣輒出宣德間始選能書者處於閣之西小房謂之西制敕房

明會要卷三十九

四

諸學士掌誥敕者居閣之東五楹具稿付中書繕進謂之東誥敕房正統後學士不能視誥敕內閣悉委於中書序

班譯字等官於是內閣又有東誥敕房

職官志
瑣錄

十三年高穀中進士選庶吉士授中書舍人

高穀傳

成化四年十二月中書舍人黃理等奏稱中書舍人紀錄綸命書寫誥敕在朝廷爲近侍之臣永樂宣德間皆以進士舉人爲之升擢亦異比年來有由勳舊錄用者有由技術乞恩者猥以白丁冒居清秩名器之濫莫此爲甚請自今除中書舍人一如永樂宣德間例下吏部覆奏從之仍定其升進之格進士舉人出身者升員外郎主事其他升

光祿寺署正著爲令

昭代典則

七年中書舍人呂憲疏乞鄉試所司執故事不許憲宗特

許之舍人得赴試自憲始

呂原傳

中書衙門在內府後事權歸內閣而成化間李應禎以鄉

舉選入文華殿者尙與給事中爭班次楊一清集中每稱

予在西掖典外制時與某翰林同官云云其後爲一品大

臣廕敘之官始漸輕矣

野獲編

李應禎爲中書舍人直文華殿有旨命寫佛經辭曰臣聞

爲天下國家有九經不聞有佛經也忤旨廷扑之因罷殿

直實錄

明會要卷三十九

五

正德元年十二月以中書李憲改選給事中憲劉瑾鄉人

謂中書由進士出身者當與博士行人一體選科道遂有

是命

明通紀

嘉靖九年定官恩生授中書舍人九年考滿無過止升職

銜照舊辦事

二十年選各部主事大理寺評事帶原銜直誥敕制敕兩

房

四十四年兩房員缺令吏部考選舉人爲中書舍人員無

正貳印用年深者掌之

已上會典

張璉言成化以前誥敕之體猶爲近古近來藻情飾僞致

夔體制宜加釐正

春明夢餘錄

隆慶元年令兩房辦事官不得升列九卿

會典

萬曆元年定兩殿中書九年考滿官升至正五品止如再有年勞止得加升服俸

春明夢餘錄

大約舍人有兩途由進士部選者得選科道部屬其直兩殿兩房舍人不必由部選自甲科監生儒布衣能書者俱可爲之不由科甲者初授序班及試中書舍人不得遷科道部屬後雖加銜九列仍帶銜辦事

職官志

中書周令嘗言成化年間中書與閣下如同僚然投刺俱平交蓋本一堂共處今之西房卽文淵閣也閣臣居中

明會要卷三十九

六

書居東西兩房各辦其事已撤內庫十間以西五間居閣下謂之文淵閣以東五間藏書籍而東房中書亦遷居之故今以閣下稱中堂而東西非房矣猶稱兩房者沿舊名也

世廟識餘錄

行人司

洪武十三年置行人司設行人正九品左右行人從九品尋改行人爲司正左右行人爲左右司副更設行人三百

四十五人

職官志

十九年二月置行人司官

昭代典則

二十二年六月辛卯令孝廉茂才年四十以下者於行人

司差遣試用

大政記

二十七年正月戊申定行人司官秩職任先是所任行人多孝廉人材奉使率不稱旨至是定設行人司官四十員以進士爲之凡頒行詔赦奉使外夷諭勞賞賜祭祀徵聘賢才賑濟軍旅等事則遣之餘非奉旨諸司不得擅差行人之職始重

昭代典則

行人於捧節奉使外每歲朝審則持節傳旨法司遣成囚徒送五府填精微冊批繳內府建文中革行人司而以行人隸鴻臚寺成祖復舊

職官志

正統七年行人司行人尙褫言旗校緝事不可盡信聞有

明皇卷三十九

七

用心邪枉者或爲他人報仇或以私怨誣陷平人緝事未能盡實請自今旗校緝事務見實證然後坐罪如或不實所緝者量重以其半坐之庶不至乘隙報怨濫及無辜從

續通典

十一年八月行人尙褫言古者刑不上大夫今文武大臣偶因微眚遽陷囹圄事或涉虛旋卽復職今日衣冠之大臣卽昨日受辱之囚繫面僚友而統屬官豈能無愧請自今有犯者召至午門大臣會問事實則疏其輕重請旨裁

決不實卽奏還其職帝頗然之惑於王振不能改也

實錄

景泰三年二月乙丑朔停差陝西禁茶行人

大政記

張甯疏國家設行人以通使命往來自洪武二十七年以前止以承差任使後欲其通達國體不辱君命始專以進士除授定制以來一應合差事件俱屬行人閒有別項官員無非一時特旨或因行人不敷故也因襲既久竟以爲常今各衙門官一切指此要求苞苴公行弊端百出易於取覓者歸之請託難於辦給者委之行人致使爲是官者一籌莫展乞申明舊制遇有事務先儘行人方許差遣別項官員其奉特旨者仍前不拘此例如有請託等項事發一體治罪

春明夢餘錄

成化十一年八月取巡茶御史還京仍差行人二員

大政記

明會要卷三十九

八

十二年五月停四川禁茶行人以按察司官領之

同上

嘉靖九年行人楊爵使王府還上言臣奉使湖廣覩民菜色挈筐操刀割道殍食之假令周公制作盡復於今何補老羸饑寒之眾奏入被俞旨

楊爵傳

欽天監

元太史院

乙巳七月壬午置太史監以劉基爲太史令吳元年十月丙午改監爲院仍以劉基爲院使洪武元年十月甲午徵元太史張佑張沂等十四人改太史院爲司天監二年二月徵元回回司天臺官鄭阿里等十一人議麻兼設回回司天監三年六月甲子改爲欽天監設令一人丞一人二

十二年改令爲監正正五品丞爲監副正六品三十一年

四月丁丑朔罷回回欽天監以其麻法隸本監職官志大政記

洪武六年令本監人員不許遷動子孫止習學天文麻算

不許習他業王圻通考

永樂元年諭吏部凡欽天監正佐官歲滿不考覈著爲令

上以欽天監職占候非常調官故有是命大政記

天順四年閏十一月丁巳以月食失占下禮部侍郎掌欽

天監事湯序於獄上謂李賢曰月食人所共知欽天監失

於推算以致救護不行因言序掌監事遇有災異多隱蔽

不言天文吉凶必詳言以進朝廷正欲知災異以見上天

明會要卷三十九

垂戒庶知修省今序如此豈爲臣盡忠之道尋貶序秩昭代

典則

正德元年五官監侯楊源言自八月初大角及心宿中星

動搖不止大角天王之坐心宿中星天王正位也俱宜安

靜今乃動搖其占曰人主不安國有憂意者陛下輕舉逸

遊以致然也又北斗第二第三第四星明不如常第二曰

天璇后妃之象后妃不得其寵則不明廣營宮室妄鑿山

林則不明第三曰天機不愛百姓雜興征徭則不明第四

曰天權號令不當則不明伏願陛下祇畏天戒安居深宮

絕嬉戲禁遊畋罷騎射停工申嚴號令毋輕出入抑遠

寵幸裁節賜予親元老大臣日事講習克修厥德以弭災
變報聞

二年源上言自正德二年來占得火星入太微垣帝座前
或東或西往來不一乞收攬政柄思患豫防蓋專指劉瑾
也瑾大怒召而叱之曰若何官亦學爲忠臣源厲聲曰官
大小異忠一也已上楊瑄傳

太醫院

甲辰四月置醫學提舉司丙午六月壬子朔改爲太醫監
吳元年九月辛卯改監爲院設院使院判典簿大政記洪武
三年置惠民藥局六年置御藥局於內府始設御醫職官志

明皇朝卷三十九

十

十四年八月癸未定設太醫院令一人丞一人二十二年
二月癸巳復改令爲院使正五品丞爲院判正六品昭代典則
凡醫家子弟舊例選入本院教習醫術宏治五年奏復行
之舉堪任教師者二人教習

凡本院院使判御醫日於內府御藥房分兩班輪直供事
凡醫士俱以父祖世業代補或令在外訪保醫官醫士以
充其精通醫術者本院奏進御藥房供事已上王圻通考

宏治中吳傑以善醫徵至京師試禮部高等故事高等入
御藥房次入太醫院下者遣還傑言於尙書曰諸醫被徵
待次都下十餘載一旦遣還誠流落可憫傑願辭御藥房

與諸人同入院尙書義而許之

嘉靖初許紳供事御藥房累遷太醫院使歷加工部尙書
領院事二十年宮婢楊金英謀逆以帛縊帝氣已絕紳急
調峻藥下之辰時下藥未時忽作聲去紫血數升遂能言
又數劑而愈帝德紳加太子太保禮部尙書及卒賜諡恭
僖明賜醫者官最顯止紳一人

已上方
伎傳

十五年改御藥房爲聖濟殿又設御藥庫詔御醫輪直供
事

職官
志

二十一年五月以夏疫令太醫院及順天府惠民藥局措
置藥物散給居民

實錄

明會要卷三十九

十一

上林苑監

元上
林署

洪武二十五年十月癸亥議開上林苑度地城南比圖上
太祖謂有妨民業遂止永樂五年三月始置上林苑監設
良牧蕃育嘉蔬林衡川衡冰鑑及典察左右前後十屬署
洪熙元年併爲蕃育嘉蔬二署宣德十年始定良牧蕃育
林衡嘉蔬四署

職官
志

正德中增設上林苑監督至九十九人侵奪公私地無算
世宗卽位命留十八人如宏治時已復傳奉至六十二人
戶部尙書孫交乞汰如初且盡歸侵奪地報許

孫交
傳

五城兵馬司

元大都路兵
馬都指揮司

太祖丙申七月置兵馬指揮司設都指揮副都指揮知事尋改設指揮使副指揮使各城門設兵馬洪武十年改爲指揮副指揮革知事二十三年定爲五城兵馬指揮司正六品俱增設吏目建文中改爲兵馬司改指揮副指揮爲兵馬副兵馬永樂元年復舊

職官志

洪武元年命在京兵馬指揮司并管市司每三日一次校勘街市斛斗秤尺稽考牙儉姓名時其物價

同上

永樂二年二月設北京兵馬指揮司

大政記

成化十二年七月北城兵馬司吏日文會條陳荆襄流民

三事下原傑斟酌處置

昭代典則

明會要卷三十九

三

嘉靖四十年閏五月庚寅詔巡視五城御史每年終將各城兵馬指揮會本舉劾

大政記

隆慶四年議准五城兵馬司以科目出身有司年壯有志者升除其遷轉視兩京知縣聽巡城御史考察

五年議准兵馬副指揮吏目以在外府衛首領州縣佐貳首領有才守者升補

萬厯二年題准兵馬指揮缺或以副指揮有資望者升補或貢例監生考除副指揮吏目仍以貢例監生考除

已上會典

順天府

元大都路都總管府

洪武二年三月癸丑置北平行省九年六月甲子改爲北

平布政司皆以北平爲會府永樂元年二月戊申朔改爲順天府十年三月甲寅升爲府尹設官如應天府職官志以

知府張貫爲順天府尹

大政記

景泰間王賢爲順天府尹嘗以柴炭爲民病言於大司空石璞曰京民勞疲極矣今採運夫役與真保諸郡等無乃不可乎璞默然爲遞減之又惜薪中貴縱其下非法陵府屬叱跪於廷賢聞趨至欲縛其人以聞主者固謝乃已景泰間再疏乞休上曰年七十禮當致仕然京畿冗繁非爾不治英宗復辟之初顧謂近臣曰府尹如賢者何可得哉

續通典

明會要卷三十九

十一

京府官在六年京察例而復與外察嘉靖閒應天治中龐嵩謂非體疏請止之遂爲永制

龐嵩傳

嘉靖四十三年順天府尹劉畿言提編之弊踰於正額臣閱本府所屬州縣夏秋兩稅額折銀不過十萬九千有奇而額外加編乃至十一萬二千六百兩有奇密邇輦轂之下採辦加派之不常添借勸設之無已是以大宛二縣有全里逃亡無一丁者有餘二三百戶者今當編均徭之期宜令各州縣官先將境內丁田覈其原額而正其欺隱差役究其因革而裁其冗濫然後按丁糧之等第爲賦役之重輕務使差徭平一不得額外濫編疏入下所司查覈以聞

紀通

應天府

洪武三年八月戊子改應天府知府為府尹秩正三品賜

銀印升知府藺以權為之大政記

永樂二年十二月戊寅上聞中官於應天府私取工匠役

之召府尹向寶等責曰爾職牧民當體國家愛民之意宦

者擅役民略不之拒又不以告以朕百姓作人情可逃罪

乎今姑宥爾若復蹈前非必誅通紀

宣德九年正月應天府尹鄭瑩奏本府與部院各御史禮

儀從之大政記

明皇卷三十九

十四

僧道錄司元宣政院

洪武元年正月立善世元教二院四年十二月革五年十

二月給僧道度牒六年八月度僧道九萬六千餘人十五

年四月置在京僧錄道錄二司外曰僧綱道紀史概

洪武六年十二月戊戌上以僧道日多蠹財耗民莫此為

甚乃詔天下府州縣止存大觀寺一僧道並處之非有戒

行通經典者不得請給度牒又禁女子年四十以下為尼

者並著為令日知錄之餘

十一年建神樂觀於郊祀壇西設提點知觀職目志

十七年閏十月癸亥禮部尚書趙瑄言自設置僧道二司

未及三年天下僧尼已二萬九百五十四人今來者益多其實假此以避差役請三年一次出給度牒且嚴加考試

庶革其弊從之

日知錄之餘

二十四年六月丁巳命禮部清理釋道二教限僧三年一度給牒凡僧道府不得過四十人州三十人縣二十人非四十年以上女年非五十以上不得出家

職官志

二十五年閏十二月命僧錄司造周知冊頒天下

大政記

二十八年七月有道士以道書獻太祖卻之謂侍臣曰彼所言者非存神固氣之道卽煉丹燒藥之說朕焉用此朕所用者聖賢之道將躋天下生民於壽域豈獨一己之長

明實錄卷三十九

十五

生久視哉苟一受其獻迂誕怪妄之士必爭來矣故斥之

母爲所惑

世法錄

文彬按太祖汰黜僧道禁令頗嚴其後以僧宗泐等數至禁中爲所惑而吳印華克勤之屬擢至大官時寄以耳目由是其徒橫甚給事中陳汶輝疏諫不聽大理寺卿李仕魯力諫竟猝死階下踰數歲始知諸僧所爲多不法下詔清理二教又卻道士之書雖見太祖悔悟之速夫亦汶輝仕魯之言有以感動之也然正德之封僧法王國師嘉靖之拜道士尙書等官安得謂非太祖有以開其漸哉

十月己未令天下僧道赴京考試給牒不通經典者黜之

職官志

永樂五年正月直隸浙江諸郡軍民子弟私披鬚為僧赴京請度牒者千八百餘人上命付兵部編軍籍發戍遼東

甘肅日知錄
之餘

十六年十月定僧道常額及限年之禁榜諭天下

大政記

宣德十年禁僧道私自簪髻及妄言惑眾者

會典

正統五年度僧道二萬餘人未幾重修大興隆寺延崇國寺僧主之帝親傳法稱弟子公侯以下趨走如行童焉

景泰二年正月度天下僧道先是僧道三年一度帝特詔

明實錄卷三十九

六

停之至是大監興安以皇后旨度僧道五萬餘人于謙諫

不省已上三編

宏治中尙書馬文升奏定制僧道府不過四十名州不過三十名縣不過二十名今天下一百四十七府二百七十七州一千一百四十五縣共額設僧三萬七千九十餘名成化十二年度僧一十萬二十二年度僧二十萬以前各年所度僧道不下二十餘萬共該五十餘萬以一僧一道一年食米六石計之共該米二百六十餘萬石可足京師一年歲用之數况又不耕不蠶賦役不加則食之者眾而為之者少其軍民壯丁私自披鬚而隱於寺觀者又不知

幾何創修寺觀遍於天下妄造經典多於儒書敗化滅倫
蠹財惑眾自京師達四方公私之財耗於僧道者過半若
不嚴禁將來遊食者何有紀極乞敕禮部通查天下並在
京寺觀若干處僧道若干名除額度之數外多若干名如
果闕有度牒難以追奪明白具奏不許額外再度僧道至
額數不足之時方許該有司具給照數起送關給度牒敢
有故違再言度僧道者許科道糾劾拏問仍通行各撫按
等官督責有司嚴加查勘但係新修寺觀即便拆毀併於
古剎大寺觀其中有原無度牒行道童卽令還俗當差違

者治罪

明臣
奏議

明會要卷三十九

七

宦官

吳元年九月丁亥置內史監尋改內使監御用監

職官
志

洪武二年八月己巳定內侍官制諭吏部曰朕觀周禮閹
寺不及百人後世多至數千卒爲大患今雖未能復古亦
當爲防微之計此輩所事不過供灑掃給使令而已若求
善良百無一二用爲耳目卽耳目蔽用爲心腹卽心腹病
馭之道但當使之畏法不可使之有功有功則驕恣畏
法則檢束自不爲非也

昭代
典則

文彬曰自來宦官之禁未有如明太祖之周再傳而法
制盡隳釀成禍本以致覆國論者咸咎成祖階之厲而

不知太祖實未得所以制之道也夫宦寺之利一而
害百雖庸闇之主知之而卒不能使左右無供奉給役
之人則將何道之從曰求所以制之可耳周官內小臣
閹人寺人內豎之屬皆內宰統之上隸於冢宰以冢宰
相總轄而又有內宰之禁令行乎其間使君無私暱下
無私干故歷八百載未聞有閹寺敢爲不義者宰相制
之也西漢制猶近古三公總九卿而少府之官內臣皆
屬焉佞幸如鄧通小有不謹申屠嘉得召而斬之權在
故也東漢以後不然矣自是迄於唐宋宦官之弊無代
無之非無英君誼辟嚴爲防閑而卒陰受其沈毒而莫

明實錄卷三十九

大

之覺總由於制之不得其道也明初內官悉隸禮部

見葉

劍旋卽更制正德中主事葉劍疏請易置司禮仍隸之

部武宗不能從向使初制不更若輩有所鈐束何得暴
橫至此太祖惟慮相權太重罷中書省散政六部鯁鯁
然內官是禁又不求所以閑制之方一家之中旣奪冢
子之柄欲使狡奴黠婢無乘閒用事以蠱惑其父母得
乎雖洪宣後閹體稍崇而璫權旣盛勢不相攝甚且有
閹臣甘爲其腹心鷹犬而不以爲羞者積重難返勢使
然也洪惟我

朝法度嚴明以太監隸內務府默體成周遺制二百餘年

未聞奄寺敢違法紀真萬世良規也益歎明祖之不揣其本雖三令五申何濟哉

六年閏十一月命考究前代糾劾內官之法禮部議置內正司設司正司副各一人專糾察內官失儀及不法者十年五月有內侍以久侍內廷言及政事上卽日斥遣歸里終身不齒諭諸臣曰此輩日在左右其小忠小信足以固結君心及其久也假竊威權以干政事遂至於不可抑自古以此階亂者多矣今立法不許寺人干預朝政決去之所以懲將來也旋令內臣不許讀書識字

已上明政統宗

十七年鑄鐵牌文曰內臣不得干預政事犯者斬置宮門

明會要卷三十九

九

中又敕諸司毋得與內官監文移往來然二十五年命聶慶童往河洲敕諭茶馬中官奉使行事已自此始

職官志

文彬按三編洪武八年五月遣中官趙成使河州市馬十一年詔以辰州指揮楊仲名討五開蠻遣內官吳誠往諭仲名且觀兵復遣尙履奉御呂玉詣軍閱勝而明史職官志於二十五年慶童之行云中官奉使自此始其實不始於此也太祖馭內侍甚嚴而奉使觀兵早開其隙是自禁之而自紊之又何怪後人之變本加厲耶

建文三年燕王因兵屢敗不敢決意南下無何有以中官奉使侵暴爲言者帝詔所在有司繫治於是中官密遣人

赴燕具言京師空虛可取狀約爲內應

編三

永樂元年遣中官侯顯等使外域

此出使外夷之始

三年六月遣中官鄭和等率兵二萬七千餘人遍歷西洋

諸國復遣中官山壽帥帥出雲州

此將兵之始

七年十一月始令中官刺事

此刺事之始

八年十二月敕內官王安等監都督譚青軍馬靖巡視甘

肅

此監軍巡視之始

十八年立東廠於東安門北以內監掌之

東廠始此

洪熙元年正月以鄭和領下番官兵守備南京

此南京守備之始已

上三編

明書卷三十九

三

二月敕王安鎮守甘肅

太監鎮守始於永樂末年正統以後凡各省各鎮無不有鎮守太監

弁山集

宣德元年七月始立內書堂改刑部主事劉翀爲翰林修

撰專授小內使書其後大學士陳山修撰朱祚俱專是職

選內使年十歲上下者二三百人讀書其中後增至四五

百人翰林官四人教習以爲常

此通文墨之始

正統十四年五月命太監金英同法司錄囚築壇大理寺

英張黃蓋中坐尙書以下左右列坐九卿抑於內官之下

遂爲永制

此審錄之始已上三編

景泰三年立十團營以太監阮讓都督楊俊提督四營太

監陳瑄盧永都督郭震馮宗各提督三營俱聽于謙石亨
及太監劉永誠曹吉祥節制

此坐營之始
奔州中官考

南京刑部主事葉釗言國初宦官悉隸禮部秩不過四品
職不過掃除今請仍隸之部易置司禮俾供雜役罷革東
廠移爲他署斯左右不得擅權而後天下可安也

葉釗
傳

天啟三年正月遣中官刺邊事十二月魏忠賢提督東廠
崇禎元年正月辛巳詔內臣非奉命不得出禁門二月丁
巳戒廷臣交結近侍

本紀

四年九月命中官張彝憲總理戶工錢糧王坤劉文忠劉
允中監視宣大山西軍馬王應朝監軍關甯張國元監軍

明會要卷三十九

三

東協王之心監軍中協鄧希詔監軍西協吳直監餉登島
李茂奇監茶馬陝西帝初卽位鑿魏忠賢禍敗盡撤諸鎮
守中官委任大臣旣而廷臣競門戶兵敗餉絀不能贊一
策乃思復用中官遂有是命

五年七月以太監曹化淳提督京營戎政

後李自成犯關
化淳開廣甯門

納之已
上三編

明會要卷四十

永新龍文彬纂

職官十二

衍聖公仍元官

洪武元年召孔子五十五世孫克堅至京師待以賓禮俾食公祿不視事

是年詔克堅子希學襲封改賜階資善大夫正二品別給銀印每入朝班亞上相予誥還其祭田備禮器樂器樂舞置屬官每至京中使慰勞館饋殊等已上王折通考

復立孔顏孟三氏學各教授立尼山泗水二書院各學錄

明會要卷四十

又授其族人希大為曲阜世襲知縣職官志

十七年正月孔訥襲封命禮官以教坊樂導送至國學學官帥諸生二千餘人迎於成賢街自是每歲入覲給符乘傳時罷丞相官遂令班文臣首

仁宗即位衍聖公孔彥縉來朝上語侍臣曰外蕃貢使皆有公館衍聖公假館民間非崇儒重道意遂賜宅東安門

外已上儒林傳

宣德間孔諤會試至京召見即與進士出身授春坊中允

夢餘錄

景泰以後凡先聖先賢先儒之後皆賜以五經博士世襲

蓋有博士之銜號而無職掌同上

成化元年給孔顏孟三氏學印令三年貢有學行者入國子監六年命衍聖公始襲者在監讀書職官志

宏治十八年衢州知府沈杰奏言衢州聖廟自孔洙讓爵之後衣冠禮儀猥同氓庶今訪得洙之六世孫彥繩請授以官俾主祀事正德元年授彥繩翰林院五經博士主衢州廟祀時以在曲阜者為孔氏北宗在西安者為南宗云

儒林傳

正德二年授孔聞禮五經博士奉子思廟祀夢餘錄

萬曆七年諭衍聖公萬壽入賀朝廷待以賓禮不在文武

明會要卷四十

二

職官之列不必朝參會典

隆慶元年吏部覆郭諫臣奏衍聖公或遇親喪仍令守制其襲封一事所司代為奏請令其守護印信候服滿起送

承襲王圻通考

崇禎十五年七月行幸學禮取衍聖公孔允植五經博士孟聞玉等傳令賜宴蓋特典也夢餘錄

王府官元內史府

洪武三年置王相府左右相左右傳參軍府參軍錄事紀善以鄭九成王克復汪河文原吉朱復為相桂彥良熊鼎為傳尋以耿炳文吳良謝成等為武相傳位居文臣上後

革又置典籤司諮議官護軍府九年改參軍爲長史罷王
傅府及典籤司諮議官增設伴讀侍讀十三年十月罷王
相府升長史司爲正五品

夢餘錄

太祖諭秦王右相鄭九成等曰朕封建諸子選用傅相委
託匪輕凡與王言當廣學問以充其行義陳忠孝以啟其
良心使其聰明無蔽上下相親庶幾道德有成而輔相不
忝厥職

世法錄

二十八年置靖江王府諮議所諮議記室教授各一人尋
亦改長史司

職官志

永樂元年四月辛未上以岷王榘所爲不法命吏部悉降

明會要卷四十一

三

其王府官職敕曰皇考封建諸王以固藩屏王府官屬有
不能輔導或誘王爲非者咸加顯戮成憲具在今岷王所
爲縱恣果出王意而汝等緘默不言乎抑導誘爲之與二
者罪必居一今姑屈法寬宥止降爾職尙圖後效以贖前
愆

世法錄

二年五月令各王府教授伴讀缺於進士第三甲內選用

大政

五年削齊王榘官屬護衛廷臣請罪王府教授葉垣等上
曰王性兇悖朕溫詔開諭至六七猶不悛教授輩如王何
垣等先自歸發其事可勿問

齊王傳

九年使者至西安秦王尙炳稱疾不出迎見使者又傲慢
帝逮治王府官吏秦王傳

十年以國子監司業趙季通董子莊爲趙府長史敕曰朕
子趙王年少多愆禮度今簡爾等爲長史宜悉心輔導諭
以德義使博究經史以知古先聖賢之行事及修身齊家
之道屏邪佞親忠良隨事規誨務歸於正以承藩輔之重
世法錄子莊隨事匡正季通同心輔導藩府賢僚首稱趙董
云桂彥良傳

正統元年遼簡王府僚乞加王祿敕曰簡王得罪朝廷成
祖特厚待仁宗朝加祿得支二千石宣宗又給旗軍三百
明實要卷四十
四

人親親已至王素乖禮度府臣不匡正願爲王請乎不許
遼王傳

成化六年秀懷王見澍就藩汝甯長史劉誠獻千秋日鑑
錄見澍朝夕誦之論書至西伯戡黎誠主吳氏說曰戡黎
者武王也右長史趙銳主孔氏說曰實文王事爭之失色
見澍曰經義未有定論不嫌往復今若此非先皇帝簡二
先生意也秀王傳

十七年徽莊王見沛就藩鈞州承奉司自置吏左布政使
徐恪革之見沛以聞憲宗書諭王置吏非制也恪無罪徽王傳

宏治三年進士選長史者恣言怨詈吏部黜之然自是人薄長史多不以進士選除

王圻通考

十六年定王府長史等官於通經人員內除補不許奏保

會典

嘉靖八年楊一清言楊士奇以審理副選編修周忱自長史累遷尙書成化中雷霖以德府長史爲山西提學副使今請王官與別官一體升用下吏部議不從

十二年題准王府長史等官今後非眞能輔導有功賢能可錄者不許請加服色品級

二十二年題准王府官凡稱病乞改用者並勒致仕以輔

明會典卷四十

五

導失職調者不得授府州縣親民官

已上王圻通考

二十五年定王府官屬除工正工副倉庫等官照舊以吏

員選除外其長史非科目出身紀善至典寶等官非監生

不除以重府僚之選

會典

萬厯間周府設宗正一人後各府亦漸置郡王增設教授

一人

續通典

布政司

元行中書省

明初略定地方置行中書省或中書分省其官自平章政事以下大略與中書省同六部尙書往往出爲參知政事參政入爲尙書洪武九年六月甲子改浙江江西福建北

平廣西四川山東廣東河南陝西湖廣山西諸行省爲承
宣布政使司罷行省平章政事左右丞等官改參知政事
爲布政使正二品十三年改正三品增設左右布政使各
一員二十二年定秩從二品建文中升正二品裁一員成

祖復舊制

職官志
夢餘錄

初設布政司以王興宗爲河南布政使興宗從上克婺州
命知金華縣事以治行聞累遷懷慶蘇州知府遇上計至
京師上以事詰諸郡守至興宗獨曰是守公勤不貪不須
問至是以擢布政陞辭宴而遣之

王宗
顯傳

洪武十一年正月徵天下布政使及知府來朝上謂廷臣

明史卷四十

六

曰布政使卽古方伯之職知府卽古刺史之職所以承流
宣化撫吾民者也得人則治否則瘵官尸位病吾民多矣
朕令之來朝使識朝廷治體以儆其玩愒之心且以詢察
言行考其治績以覘其能否苟治效有成天下何憂不治

世法
錄

十四年正月乙巳以助教趙新等爲布政使諭之曰今布
政使視古之牧伯其任甚重在承流宣化通達民情也若
上德不下究下情不上達遠邇乖隔上下不親民不可得
而治矣卿等慎之

同上

十五年二月乙卯置雲南布政司命汝南侯梅思祖署司

事平章潘原明張統等爲參政參議等官

大政記

二十年正月雲南左布政張統入覲治行爲天下第一特

令吏部勿考賜璽書褒之遣還任

張統傳

二十四年七月以貢士彭友信爲北平布政使

大政記

二十六年盡擢監生劉政龍鐔等六十四人爲行省布政

按察兩使及參政參議副使僉事等官

選舉志

永樂五年六月癸未置交陞布政司以前工部侍郎張顯

宗福建布政司左參政王平爲左右布政使

通紀

十一年二

月辛亥設貴州布政司以蔣廷瓚爲布政使貴州爲內地

自此始

明政統宗

明實錄卷四十

七

宣德三年罷交陞布政司除兩京外定爲十三布政司

職官志

正統四年裁貴州右布政使右參議各一員

大政記

宏治四年進陶魯湖廣右布政使治兵兩廣如故魯言身

居兩廣而官以湖廣爲名於事體非便乃改湖廣左布政

使兼廣東按察副使領嶺西道事人稱之爲三廣公

陶成傳

萬厯中萬士和爲廣東左布政使政事故專決於左士和

曰朝廷設二使如左右手非有軒輊乃約右使分日治事

士和傳

分守道

洪武九年置左右參政各一員從二品十三年改從三品十四年正月增置左右參議各一員正四品職官志是年二月丁巳擢鄭湜爲福建左參議命舉所知湜舉同郡王應

等五人皆授參議孝義傳

內地監司率序遷其後亦多超遷不拘次有一歲四五遷由僉事至參政者選舉志

十五年七月以賢良方正何德思爲河南右參議聰明正直金思存爲北平右參議孝弟力田聶士舉爲四川左參

政賢良方正蔣安素爲四川右參議弁山集是年九月己酉吏部以經明行修之士鄭韜等三千七百

明彙卷四十一

餘人入見賜韜等人鈔一錠授布政使參議等官大政記

永樂十二年三月吏部言布按二司多缺官上曰布政按

察古方岳臣方數千里地懸數十人其簡廷臣中賢能者分別用之於是諸曹郎給事中出爲監司者二十餘人

陳士啟傳分守起於永樂間每令方面官巡視民瘼後遂定右參政右參議分守各屬府州縣職官志

嘉靖元年正月辛未添設遼東甯海道參議一員大政記

御史吳從憲請復設山東布政司參政一員專理蘇松常鎮稅糧令浙江按察司僉事兼轄蘇松諸郡縣水利從之

王圻通考

隆慶五年陝西布政使曹金請設左參議一員分守關內道共督糧驛傳事務更左參政管理按察司復設僉事一員管理屯田水利其糧儲事務令清軍副使攝理從之同上

按察司元肅政廉訪司

明太祖甲辰十一月辛酉置湖廣各道提刑按察司丙午

正月命僉事周湏定按察司事宜條憲綱以進吳元年十

月置各道按察司十三年五月罷十四年二月復置二十

二年定按察使為正三品建文時改為十三道肅政按察

司成祖初復舊職官志夢餘錄

洪武元年浙江江西湖廣三提刑按察使李祥潘黻滕毅

明會要卷四十

充議律官上大明令王圻通考

十年各道按察司官來朝諭之曰朕以天下之大民之奸

宄者多牧民官不能悉知其賢否故設風憲官為朕耳目

激濁揚清繩愆糾繆此其職也國家法律必務精詳奸民

犯法吾所甚惡當亟除之不可貸也有司以撫治吾民為

職享民之奉而不思恤民惟以貪饕掎克為務此民之蠹

也宜糾治其罪毋姑息縱其為害汝等當體朕此意世法錄

國子監生為按察使者龍鐔浙江阮友彰福建王禮北平

李皓山西曲能山東龔山集

三十年正月置雲南按察司職官志

永樂五年六月癸未置交趾按察司以前河南按察使阮

友彰為按察使集 奔山

十五年三月設貴州按察司本紀止書永樂十一年設貴州布政司職官志云十二年

置貴州按察司按三編質實於設布政司後二年置按察司證之大政記系之十五年三月略相符今据書之

十六年鄭辰遷山西按察使潞州盜起有司以叛聞詔發

兵討捕辰方以事朝京師奏曰民苦徭役而已請無發兵

帝然之還則屏騶從親入山谷撫諭盜皆感泣復為良民

鄭辰傳

宣德五年革交趾按察司除兩京不設共十三按察司職

志

明會要卷四十

十

成化中陳選為河南按察使決遣輕繫數百人重囚多所

平反囹圄空虛治尚簡易獨於賊吏無所假然受賂百金

以上者坐六七鑊而止或問之曰奸人惜財亦惜命若盡

挈所賂以貨要人即法撓矣陳選傳

楊繼宗遷湖廣按察使既至命汲水百斛洗滌廳事而後

視事曰吾以除穢也為浙江按察使時倉官十餘人坐缺

糧繫獄至鬻子女以償繼宗欲寬之而無由一日送月俸

至命量之則溢原數較他司亦然因悟倉吏缺糧之由將

其實以聞眾懼請於繼宗願捐俸貸償由是十人者獲釋

繼宗傳

分巡道

吳元年置布政司副使正四品洪武十六年改從四品二十二年復定爲正四品太祖甲辰以章溢爲湖廣按察司僉事尋升浙東副使溢辭仍爲僉事初置僉事正五品洪武十五年九月置天下府州縣按察分司以儒士王存中等五百三十一人爲試僉事人按二縣十一月頒巡按事宜於各處按察司僉事集十六年三月盡罷試僉事定僉事從五品多寡從其分道之數二十九年改置按察分司爲四十一道仍定僉事爲正五品職官志

洪武七年五月壬辰以兵部員外郎楊基爲山西副使御

明史卷四十

十一

史答祿與權爲廣西僉事呂本爲北平僉事諭之曰風憲之設在整肅紀綱澄清吏治非專理刑爾等務明大體毋拘拘繩墨之末世法錄

是年茹太素爲刑部侍郎上言在外省衛凡會議軍民事宜各不相合致稽延請用按察司一員糾正從之太素傳

二十五年定王府筵宴按察僉事坐次舊長史上殿僉事坐廡下公聚長史亦居僉事上上謂僉事方面官宜入殿

坐長史上

昭代典則

永樂五年增設各按察司僉事因督軍運屯糧增浙江江西廣東廣西湖南雲南四川各一人陝西福建山東

山西各二人此增設監司之始

正統三年增設理倉副使僉事又設僉事與布政司參議各一員於甘肅監收倉糧

已上職官志

四年十月裁貴州副使一員僉事二員

大政記

八年增設僉事專理屯田

景泰二年增巡河僉事

已上職官志

成化二十年四月增設山西副使僉事各二員時余子俊奏大同宣府二處倉場遠隔政務殷劇請增設監司督理糧餉乃舉南陽知府雍泰成都知府毛松齡爲副使慶陽同知李萼鄜州知州周甯爲僉事

通紀

明會要卷四十一

十一

宏治元年馬文升奏舊例凡各處按察司官有缺吏部於兩京法司御史郎中員外郎主事評事等官內除授都布二司理問斷事司斷事及各府推官有缺俱於法司歷事舉人監生內除授近年以來吏部將各處知府除授副使府同知知州除授僉事而推官斷事等官一概以年老監生除授乞敕吏部今後各處按察司不分問刑管屯整飭兵備等官有缺俱於兩京法司屬官內推選除授推官理問斷事有缺俱於法司辦事進士及歷事年力精強舉人監生內除授不宜似前一概濫除又我朝設按察司以總理各道以肅清郡縣其分巡分管官常川在外徧歷所屬

接受詞訟禁革奸弊是以貪污知所警懼近年以來多有顧戀妻子罔肯出巡所過州縣暮到朝行甚至偏僻去處經年不至地方事情全不留意所以政令日隳而奸弊滋甚也乞敕各處巡撫巡按等官今後布按二司分巡分管官每年春二月中出巡七月中回司九月中出巡十二月中回司務要徧歷所屬每處所住不拘日期凡貪官污吏蠹政害民及一切興利除害之事有益地方者務在舉行每季終分巡官將一應合行事件各開報撫按處查考撫按回日仍具略節總類開奏並該部候三年六年考滿之時據此黜陟若推諉避事曠職苟祿不依期限擅自回司者許巡按御史指實參奏

明臣奏議

明會要卷四十

三

三年三月設四川水利僉事一員八月復設廣東雷廉副使十一月設天津副使轄山東以劉福爲之

六年五月定陝西管糧僉事三年一更

七年二月革浙江水利僉事一員并其事於管屯

已上大政記

隆慶元年陝西巡撫以一省八府道路遼闊非一人能周題革督糧驛傳而以分守道兼管糧餉清軍道兼管鹽糧

水利

王圻通考

兵備道 兵道之設仿自洪熙間以武臣疎於文墨遣參

政副使沈固劉紹等往各總兵處整理文書商榷機密未

嘗身領軍務也至宏治中本兵馬文升慮武職不修議增副僉一員敕之自是兵備之員盈天下

職官志

宏治十年十月改湖廣水利僉事爲上荆南兵備道

正德七年正月設潼關兵備副使二月知縣許達牛鸞以功升擢兵備僉事

十年五月以廣東右布政使吳廷舉兼副使治嶺西兵備嘉靖六年六月令湖廣興國州黃梅廣濟二縣仍聽九江

兵備節制

已上大政記

十五年正月壬戌改湖廣上湖南道分巡僉事爲兵備僉事駐劄蘄州專管漢陽而下至蘄黃德安等處名曰下江

明會要卷四十一

兵

防道原駐岳州僉事專管武昌而上至沔陽岳州常德長沙等處名曰上江防道各給敕書關防從巡撫程瓚請也

通紀

五月乙卯定山西冀北兵備道移駐大同府

大政記

時吳桂芳提督兩廣軍務建議海道副使轄東莞以西至瓊州領番夷市舶更設海防僉事巡東莞以東至惠州專

禦倭寇

吳桂芳傳

胡世甯疏言分巡僉事初制九年改道後因屢改官不省事人不畏官今宜於考滿日方許改道仍覈其治狀爲殿最其兵備提學推才力相應者先加副使勿移他方令久

任專制責其成功年深勞著者提學升少卿祭酒兵備升各邊巡撫其餘照常遷轉

圖書編

隆慶二年奏准以四川按察司屯鹽水利茶法二道合爲一道建昌兵備道改爲兵糧道敘瀘兵備道改爲下川南兵備道俱兼管分巡上川南分守道當移駐雅州川西分守道當移駐嘉定州

四年議准裁革廣東屯鹽僉事併其事於清軍副使南韶兵備副使仍改設僉事如故

已上王圻通考

沈德符曰自宏治間設兵備官大都邊方近夷地也正

德間流寇起中原皆設立矣嘉靖末年東南倭事日棘

明會要卷四十

五

於是江浙閩廣之間凡分巡者多帶整飭兵備銜其始欲隆其柄以鈐制武臣訓督戰士意非不善但承平日久仍如守土之吏無兵可練無餉可支雖云兵備而問其整飭者何事卽當局亦茫然也

提學

元各行省有儒學提舉司

正統元年五月南京戶部尙書黃福言比來生員學藝疏

淺宜令布政按察二司遍歷考試庶得眞才於是兩畿及

十三布政司各置提督學校官一員兩畿以御史十三布

政司以按察司僉事著爲令

三編

八年孫鼎督南畿學政置本源錄錄諸生善行行部不令

人知單輿驟至諸生謁輒閉門試之卽日定甲乙諸生試歸榜已揭通衢請託者無所措手

彭勛傳

十年令提學官遍詣所屬學校嚴加考試提督生徒學業

務見實效有不職者禮部都察院具奏罷黜

王圻通考

景泰元年罷提學官天順六年復設各賜敕諭十六條俾

奉行之

選舉志

成化中敕提學各分督所屬官簿錄諸儒生德業爲三等德行優文學贍治事長者爲上等有德行而經義治事稍劣者次之卽經義治事優長而德行玷缺者爲下等歲課月考非上等毋得應貢舉

夢餘錄

明會要卷四十

夫

陳選督學南畿頒冠婚喪祭射儀於學宮令諸生以時肄之作小學集註以教諸生按部常止宿學宮夜巡兩廡察諸生誦讀除試牘糊名之陋曰己不自信何以信於人督河南學政汪直出巡都御史以下皆拜謁選獨長揖直問何官選曰提學副使直曰大於都御史耶選曰提學何可比都御史但忝人師不敢自詘辱直好語遣之

陳選傳

宏治十七年六月定廩生不諳文理者追糧爲民濫貢者

提學官參究

十八年十月令提學官設三等簿稽覈生員

正德五年五月定巡按官不許侵提學考試

已上大政記

席書爲貴州提學副使時王守仁謫龍場驛丞書擇州縣

子弟延守仁教之士始知學

席書傳

十年給各按察司提督學校關防

王圻通考

嘉靖十一年六月定提學官歲貢廷試被黜五名以上者

降一級三名以上者提問

大政記

十九年六月給事中楊允繩請敕吏部慎選督學官從之

明政統宗

李中爲廣西提學副使以身爲教授諸生高等聚五經書

院五日一登堂講難

李中傳

萬厯初諭提學不理刑名如有軍民人等訴告冤枉等事

明實錄卷四十

七

許收詞狀輕則發有司重則送按察司直隸送巡按御史

督撫巡按及布按二司不許侵提學職事如提學行止不

端許巡按御史指實奏聞

夢餘錄

四年令各處鄉試畢日吏部會同禮部將各提學官從公

考察分別等第優異降黜有差

王圻通考

四十一年南直隸分上下江湖廣分南北各增提學一員

選舉志

都轉運鹽使司

仍元官

明太祖丙午二月己巳置兩淮都轉運司吳元年二月丁未置兩浙都轉運司於杭州洪武二年正月丁未置長蘆

河東二都轉運司十二月己丑置山東福建二都轉運司
分司十四泰州淮安通州隸兩淮嘉興松江甯紹温台隸
兩浙滄州青州隸長蘆膠萊濱樂隸山東解鹽東場西場
中場隸河東分副使若副判泄之五年二月癸未置四川
茶鹽都轉運司設官如都轉運鹽使司夢餘錄

正統初大臣言兩淮鹽政久壞宜得重名檢者治之於是
推擇耿九疇爲鹽運司同知痛革夙弊條奏便宜五事著
爲令十年正月爲都轉運使節儉無他好公退焚香讀書
廉名益振耿九疇傳

轉運使事權最繁鉅先朝最重此官自隆慶初始罷大臣

明會要卷四十

六

不遣歸重巡鹽御史及鹽法道於是運使之權日輕體日
削且銓地以知府之下考者胄子乙科往往得之人亦不
復自愛而鹺政日壞矣夢餘錄

徐問轉長蘆鹽運司運司故利藪自好者不樂居問曰吾
欲清是官終任不取一錢徐問傳

隆慶五年大學士高拱疏行太僕苑馬寺專理馬政戎伍
所資鹽運司專理鹽政國用所賴皆係要職非閒局也近
來視之甚輕卽卿與使皆以考不稱職有物議者升之夫
旣不稱職去之而已奈何以此等衙門爲安置之所今後
大破常套凡卿使員缺必以廉謹有才望者推補又議其

階格卿視布政司參政使視按察司副使政成之後升與參政副使同如更優異超等擢用則其官自重賢者樂就必盡心於所職馬政鹽政當自修舉所利於國家必多疏

入允行

明臣奏議

鹽課提舉司

洪武二年正月丁未置廣東海北鹽課提

舉司三年十二月戊午於陝西察罕腦兒之地置鹽課提舉司後漸增置各處建文中改廣東提舉爲都轉運司永

樂初復故

職官志

明會要卷四十一

永新龍文彬纂

職官十三

府

元府尹或知府又府州縣各有達魯噶齊

明初改諸路爲府洪武六年分天下府三等糧二十萬石以上爲上府知府秩從三品二十萬石以下爲中府知府正四品十萬石以下爲下府知府從四品已並爲正四品計天下府凡一百五十有九其同知通判推官分掌清軍巡捕管糧治農水利屯田牧馬等事無定員

職官志

明會要卷四十一

一

吳元年選郡縣官三百三十四人賞綺布道里費及其父母妻子有差著爲令曰以養汝廉奉公無漁民也洪武元年詔中書省自今除府州縣官賜銀十二兩布六疋徵天下賢才爲守令厚賜而遣之

鄭曉今言

洪武六年七月丁卯以戶部侍郎陳則爲大同府知府諭之曰大同居邊塞之間昔之有司多爲諸將迫脅以壞法廢事而罹刑罪者比比有之爾往毋蹈覆轍當守法奉公不爲阿私如邊將妄有所求當告以朝廷法度阻其非心則汝可以遠罪邊將亦得以保全其功

七年六月諭吏部曰古稱任官惟賢才凡郡得一賢守縣得一賢令如潁川之黃霸中牟之魯恭何憂不治今北方

郡縣有民稀事簡者而設官與繁劇同祿入供給未免疲
民可量減之於是吏部議奏汝河南山東北平府州縣官
三百人

永樂元年前謂吏部都察院曰爲國牧民莫切於守令守
令賢則一郡一邑之民有所恃而不得其所者寡矣如其
不賢當速去之然吏部選授之時出於倉猝未能悉其才
其令巡按監察御史及按察使凡府州縣到任半歲之上
者察其能否廉貪之實具奏

十年諭吏部曰守令一郡一邑之長昔人每戒數易蓋牧
守之寄甚重須久於其職比聞諸司以造作雜務輒差正

明倫彙編卷四十一

二

官意在成事之速此俗吏不識大體自今一應公務不許

擅差守令俾專職理民

已上世
法錄

宣德五年帝以知府多循資格不稱職會推地劇九郡缺
守命大臣舉京官廉能者用之乃擢郎中况鍾知蘇州趙
豫知松江莫愚知常州羅以禮知西安員外郎陳本深知
吉安邵旻知武昌馬儀知杭州御史何文淵知温州陳鼎
知建昌皆賜勅俾馳驛之任其冬復用薛廣等二十九人
亦如之諸人俱有治績居官至一二十年者吏稱其職民
安其業一時蒸蒸稱盛

三編

譚讓改衢州通判政尙嚴厲夜有人書麻壁曰虎豹在山

雷行於天人宜自度不可犯譚譚顧視笑曰爲政不能使民無犯而使不可犯耶更治寬緩民愈稱順續通典

英宗復位欲仿先朝故事命吏部選內外臣僚爲郡守九月以御史林鶡爲鎮江知府河東運判楊浩爲順德知府

陸辭召至文華殿賜宴及道里費

明政統宗

成化初楊繼宗擢嘉興知府以一僕自隨署齋蕭然性剛廉孤峭人莫敢犯而時時集父老問疾苦爲祛除之中官過者繼宗遺以菱芡厯書中官索錢繼宗卽發牒取庫金曰金具在與我印券中官咋舌不敢受入覲汪直欲見之不可憲宗問直朝覲官孰廉直對曰天下不愛錢者惟楊

明會要卷四十一

三

繼宗一人耳

繼宗傳

三年八月巡按御史言江西賦繁官少催征不力逋負者多請增設司府佐貳官俾專督理乃增布政使參政一南昌吉安撫袁臨江饒瑞七府同知各一三編

五年命知府員缺仍聽吏部推舉踰年以會舉多未當并

方面官第令吏部推兩員以聞

選舉志

十三年江西吉安知府張銳奏江西大家結黨爲非吉安尤爲健訟盜犯至數千人官少不能決斷請增設推官一

員上從之

野獲編

嘉靖時王儀爲蘇州知府謂蘇賦當天下一而田額滑

無可考何以定賦乃履畝丈之使縣各爲籍以八事定田賦以三條覈稅課徭役雜辦維均治爲知府第一

王儀傳

張瀚爲大名知府諳達圍京師詔遣兵部郎中徵畿輔民兵入衛瀚立閱戶籍三十丁簡一人而以二十九人供其餉得八百人馳至真定請使者閱兵使者稱其才

張瀚傳

郁山爲温州守元輔張孚敬歸里建寶綸樓大治第宅又求廣其基地強買不休山自往止之曰居第當遺之子孫公今移易幾何家市垣已里餘矣而意猶未足殆非所以善後計也且公居朝嘗喜稱伊傅周召之爲奈何所以處家者顧出蕭何李沉下哉

續通典

明會彙卷四十一

四

萬厯末李應昇授南康推官出無辜十九人於死置大猾數人重辟士民服其公廉爲之謠曰前林後李清和無比林謂晉江林學會以清慎著稱

李應昇傳

天啟時曾櫻爲常州知府屯田御史索屬吏應劾者櫻不應御史危言恐之答曰僚屬已盡無可糾止知府無狀因自署下考杜門待罪撫按亟慰留乃起視事

曾櫻傳

州元上州州尹中州下州知州

凡州有二有屬州有直隸州屬州視縣直隸州視府而品秩則同同知判官俱視其州事之繁簡以供厥職計天下

州凡二百三十有四

職官志

洪武三年正月吏部請謫有罪人於儋崖上曰前代謂儋崖爲化外以處罪人朕今天下一家若有風俗未淳宜更擇良吏治之豈可棄之化外不許編三

十七年八月詔州民戶不滿三千者皆改爲縣凡三十七

州大政記

仁宗初以風憲官備外任出給事中蕭奇商賓鄭來等三

十五人爲州縣官明政統宗

正統中茂州知州陳敏累進右參議仍視州事以監司秩

涖州前此未有也陳敏傳

成化十四年四月吏科都給事中趙侃等上言州縣守令

明會要卷四十一

親民之職不宜以監生序補乞諭吏部取科目出身者選授之部臣覆稱先年大學士李賢請選監生有學識者授以知州知縣等官至今行之且歲貢久在大學固難以科目拘今後但嚴加考覈仍循舊制爲便報可通紀

都御史李賓請令在京五品以上管事官及給事御史各

舉所知以任州縣從之選舉志

宏治元年左都御史馬文升奏往年知州知縣未盡得人該大學士李賢奏准凡遇朝覲之年吏部於聽選監生舉人內不分赴選遠近考選銓除臣在陝西巡撫之時亦曾具奏於進士舉人內選擇除授以此大州巨邑民頗受惠

近年以來各處知州知縣有一年不曾除授者甚至有二年除授不到者乞勅吏部查照大學士李賢奏准事例每年一次於聽選舉人監生內考選年力精強堪任知州知縣者若干人臨時於各衙門辦事進士內相兼選用不許將雜行之人除補

明臣奏議

十五年尙書馬文升奏今之收令由進士舉人出身者多得其人由監生除授者鮮有能稱其職揆其所自監生坐監並在吏部聽選二十餘年方得出身至除授之時年已五十以上神志昏倦其意以爲在任不久又將黜退升用之例諒不我及是以惟便身圖罔有治民之心雖有考察

明實錄卷四十一

六

黜退之例而後之除授者更甚於前不求所以更張遴選之則小民送舊迎新徒爲勞費乞勅吏部今後各處州縣有缺將在部聽選舉人不分到部年月遠近及監生中年未老耄資質英俊者通行考選並將各部觀政進士依甲數挨次取用除京任外其餘相兼舉人監生除授知州知縣並令巡按及布按二司各舉所知三五員具奏吏部定奪授職如有貪酷事發連坐舉主之罪以後州縣有缺俱照此例除選

同上

嘉靖中周思兼爲平度知州躬巡郊野坐籃輿中攜飯一盂令鄉民以次舁行因盡得閭閻疾苦狀悉蠲去之旁郡

饑民掠食所司持之急且爲亂上官檄思兼治之作小木牌散四郊令執牌就撫悉拯以錢穀事遂定

周思兼傳

隆慶四年給事中賈三近言近年州縣長吏率重甲科而輕鄉舉同一寬也在進士則爲撫字在舉人則爲姑息同一嚴也在進士則爲精明在舉人則爲暴戾低昂之間殿最攸異宜下吏部凡州縣長吏毋得偏重進士署印毋得濫授雜流詔允行

通紀

萬厯二十一年山西巡撫魏允貞以汾州有兩郡王宗人與軍民雜處知州秩卑不能制奏改爲府

允貞傳

萬厯中泰安州同知張壽朋當貶秩文選郎謝廷家用爲

明會要卷四十一

七

太平推官謂州同知六品而推官七品也巡按御史傅好禮馳疏劾其非制壽朋改調

傅好禮傳

縣元縣尹

吳元年十二月定縣三等糧十萬石以下爲上縣知縣從六品六萬石以下爲中縣知縣正七品三萬石以下爲下縣知縣從七品已並爲正七品縣丞主簿分掌糧馬巡捕之事典史典文移出納如無縣丞或無主簿則分領丞簿職編戶不及二十里者並裁計天下縣凡一千一百七十

有二職官志

洪武元年諭新授北方縣令曰新附之邦生民凋瘵不有

以安養之將復流離失望爾等宜體朕意善拊循之毋加
擾害簡役省費以厚其生勸孝勵忠以厚其俗能如朕言
不特民有受惠之實卽汝亦獲循良之名昭代典則

十年五月戊寅朔覈戶糧州改爲縣者十二縣併者六十
大政記
下同

十七年八月令諸州民戶不及三千者皆改爲縣凡三十
七州

十九年四月丙午擢慈谿縣丞秦仲彰爲甯波知府降知
府李仲文爲慈谿縣丞時仲文遣吏馬仁生行縣違法仲
彰械仁生至闕下上嘉之故有是命昭代典則

二十四年正月新化縣丞周舟以廉勤考課得最升吏部
明皇卷四十一
八

考功主事縣民蕭俊等詣闕言自舟去後民被擾不安詔
復以舟爲新化縣丞仍令禮部宴賞遣之明政統宗

南豐縣典史馮堅上書言九事書上上稱其知時務達事
變乃擢堅爲左僉都御史馮堅傳

龍陽瀕洞庭數罹水患逋賦數十萬典史青文勝詣闕上
疏爲民請命再上皆不報歎曰何面目歸見父老復具疏

擊登聞鼓以進遂自經於鼓下上聞大驚詔寬龍陽租二
萬四千餘石定爲額邑人建祠祀之青文勝傳

太祖起閩右稔墨吏爲民害嘗以極刑處之然每旌舉賢
能以示勸勉不專任法也嘗遣行人齎敕并鈔三十錠內

酒一尊賜平陽知縣張礎又建陽知縣郭伯泰丞陸鎰爲政不避權勢遣使勞以酒醴遷其官丹徒知縣胡夢通丞郭伯高金壇丞李思進坐事當建民詣闕言多善政帝並賜內尊降敕褒勞永州守余彥誠齊東令趙敏等十人坐事下獄部民列政績以請皆復官宜春令沈昌等四人更擢郡守其自下僚不次擢用者甯遠尉王尙賢爲廣西參政祥符丞鄒俊爲大理卿靜甯州判元善爲僉都御史芒陽令李行素爲刑部侍郎至如懷甯丞陳希文宜興簿王復春先以善政擢已知其貪肆旋置重典所以風厲激勸者甚至以故其時吏治多可紀述云

魏觀傳贊

明皇朝卷四十一

九

宣宗初雙流知縣孔友諒上言六事其一言守令親民之官古者不拘資格必得其人不限歲月使盡其力今居職者多不知撫字之方而廉幹得民心者又遷調不常差遣不一或因小事連累朝夕營治往來道路日不暇給乞敕吏部擇才望素優及久歷京官者任之諭戒上司毋擅差遣假以歲月責成治効至遠缺佐貳多經裁減獨員居職或遇事赴京多委雜職署事因循苟且政令無常民不知畏今後路遠之缺常留一正員任事不得擅離庶法有常

守黃澤傳

宣德七年太監劉甯隨御史赴各省捕袁琦黨事畢還道

經故城縣丞陳銘素惡內官聞甯至輒奮前捽甯手擊之御史奏丞無狀逮至上曰丞固可罪然一時偏於所惡姑宥之仍遣復任

昭代典則

正統七年罷薦舉縣令之制

選舉志

天順三年建安老人賀煬上書論時事言今銓授縣令多年老監生逮滿九載年幾七十苟且貪汙宜擇年富有才能者其下僚及山林抱德士亦當推舉

張昭傳

王恕在部中有益都縣新進土石存禮年二十二歲應選知縣乃改選人

嘉靖時給事中楊允繩言古者立郡縣之等明銓序之品

明會要卷四十一

十

所以人與地相適今宜劑量政務煩簡地方邊腹道里衝僻列三等爲銓除如履任後人或未相宜令撫按官奏報改調

已上夢餘錄

御史包節出按雲南時仕者以荒徼憚不欲往因設告就遠方之法節言此曹志甘投荒非年追衰遲則家貧急祿志在爲己豈在恤民滇中長吏所以多不得人也請自今以附近選人充之而州縣佐貳始用此曹庶吏治可舉吏部請以節言概行於雲貴兩省制可

包節傳

隆慶四年大學士高拱奏廣東舊稱富饒之地近年盜賊充斥皆有司不良所致用人者以廣東爲瘴癘之鄉劣視

其地有司由科甲者十之一二而雜流者十之八九銓除者十之四五而遷謫者十之五六以甘於自棄之人處僻遠之地宜其無所忌憚驅民於盜賊也今後廣東州縣正官必以進士舉人相兼選除雜流遷謫姑不必用至廣西雲貴皆稱絕徼宜以此例推行疏入允行

明臣奏議

高拱又言薊遼山陝沿邊有司雖是牧民之官實有疆場之責乃官其地者非雜流則遷謫蓋徒以邊方爲遠地曾不思遠地安然後內地得以安也今後各邊有司必擇年力精強才氣超邁者除補或查治有成績兼通武事者調用又議其賞罰有能保惠困窮者以三年爲率加等升遷

明會要卷四十一

十一

有能捍患禦敵者以軍功論不次擢用如才略恢宏可當大任由此爲兵備巡撫總督無不可者惟以治效爲準不必論其出身資格若用之不效無益地方者降三級調用或觀望推諉以致誤事者輕則罷黜重則軍法治罪得旨

允行

同上

五年從大學士高拱言令舉人就選之時必稽其年貌五十以上者授以雜官不得爲州縣之長

夢餘錄

萬厯十一年副都御史邱橈陳吏治積弊八事其一言州縣佐貳雖卑亦臨民官必待以禮然後可責以治今也役使譴訶無殊輿隸獨任其污黷害民不脣禁治禮與法兩

矢之邱楨傳

崇禎六年縣令將行取者詔戶部先覈其錢穀徵賦不及額不得考給事中周瑞豹考選而後完賦帝怒貶謫之命如瑞豹者悉以聞熊開元傳

儒學仍元官

明初置儒學提舉司洪武二年十月辛卯詔天下府州縣皆立學府設教授州設學政縣設教諭各一俱設訓導府四州三縣二又有都司儒學十七年置遼東始行都司儒學二十一年置北平始衛儒學十七年置岷州衛二以教武臣子弟俱設教授一人訓導二人河東又設都轉運司儒學制如府其後

明會要卷四十一

十一

宣慰安撫等土司俱設儒學職官志

明初教官給由至京師詢民疾苦崑崙吳從權山陰張桓皆言臣職在訓士民事無所與太祖怒曰宋胡瑗為蘇湖教授其教兼經義治事漢賈誼董仲舒皆起田里敷陳時務唐馬周不得親見太宗且教武臣言事今既集朝堂朕親詢問俱無以對志聖賢之道者固如是乎令竄之遠方且榜諭天下學校使為鑑戒蕭岐傳

十四年十一月禁有司不得差遣學官大政記

十五年十二月詔各處教官九年滿用為教諭同上

河南參議董倫言儒學訓導宜與冠帶別於士子訓導始

注選董倫

二十年九月命吏部選南方學官有學者於北方上以北方學校無名師生徒廢學故有是命代則

二十四年六月甲子定儒學訓導位雜職上大政記

胡儼南昌人以舉人授華亭教諭母憂服除改長垣乞便地就養後改餘干學官許乞便地就養自儼始胡儼傳

二十六年五月定學官考課惟以中式多寡爲差大政記

永樂二年吏部言甯國府訓導考滿當調其生員以訓導明經善教乞還本學俾諸生得卒所業然訓導所書奏牘有錯誤宜治罪上曰學官明經善教於今難得奏牘錯誤

明會要卷四十一

三

小過可恕其宥之復職世法錄

六年十二月丙申諭自今教官考滿吏部同六科都給事中選其有才識者留六科辦事一年後從本科都給事考其高下用之大政記

十八年九月擢教授蘭從善林長懋教諭徐永達並爲翰林院編修侍皇太孫講讀明政統宗

文彬曰明初重學官一途凡輔導東宮纂書衡文及經保薦與九載考滿者必授以翰林春坊科道清華之選故楊文貞薦儀智謂其起家學官蓋以此爲美談也厥後師儒職輕副榜舉人不屑就而貢生年邁及貧困甚

者乃甘心充位被薦者雖部曹猶將靳之而况其他惟朝廷待之甚輕故教官之自待愈苟無怪學規不振儒術之日替也

宣德二年五月編修陳景著以親老改福州府教授

大政記

兩京國學教官例不得遷擢成化初祭酒邢讓等以爲言

由科目者滿考得銓敘

邢讓傳

景泰元年令歲貢生員願就教職者從翰林院考中除學

正教諭訓導

正德九年奏准進士就教職者其俸給照原中甲第品級

關支

已上會典

明倫彙編卷四十一

古

嘉靖時海瑞署南平教諭御史詣學宮屬吏咸伏謁瑞獨

長揖曰臺謁當以屬禮此堂師長教士地不當屈

海瑞傳

崇禎初廷議汰冗官帝謂學官尤冗大學士錢龍錫言學

官舊用歲貢生近因舉人乞恩選貢纂修占缺者多歲貢

積至二千六百有奇皓首以沒良可憫且祖宗設官於此

稍寬者以師儒造士需老成故也帝納之

錢龍錫傳

巡檢司

仍元官

洪武二年以廣西地接猺獞始於關隘衝要之處設巡檢司以警奸盜後遂增置各處十三年二月特賜敕諭之尋

改爲雜職

職官志

十三年十月汰天下巡檢司非要地者三百五十四

大政記

十二月敕諭天下巡檢曰古者設官分職不以崇卑一善之及人人受其利朕設巡檢於關津阨要遍察奸僞期在士民樂業商旅無艱然自設置以來未聞舉其職者今特遣使分視各處以檢防有道譏察有方有能堅守是職鎮靜一方秩滿來朝朕必嘉焉

實錄

二十年四月增置福建巡檢司四十有五分隸諸衛

二十五年閏十二月辛卯更定巡檢考課之法

正統十一年十二月增設廣西巡檢司三十六所

宏治十六年三月辛巳裁廣西巡檢司十七處

已上大政記

明會要卷四十二

永新龍文彬纂

職官十四

駙馬都尉

元駙馬皆封王爵

駙馬都尉位次於侯凡尙大長公主長公主公主並曰駙馬都尉尙郡主縣主郡君鄉君曰儀賓食祿有差皆不得

預政事

王圻通考

凡選駙馬禮部榜諭在京官員軍民子弟年十四至十六容貌齊整行止端莊有家教者報名司禮內臣於諸王館

會選

禮志

明會要卷四十二

一

洪武三年以駙馬都尉王恭爲福建行省參政

世法錄

三月定駙馬都尉班次在百官本品之上由西門出入大政記

駙馬都尉黃琛王克恭誥稱鎮國上將軍蓋正二品也琛克恭所尙主太祖從姊例當裁爲儀賓太祖不忍故仍其

號而下其階

弇山集

十九年敕駙馬都尉梅殷提督山東學校兼理地方事務

弇山集

帝春秋高諸王強盛殷嘗受密命輔皇太孫及燕師

日逼惠帝命殷充總兵官鎮守淮安悉心防禦號令嚴明

燕兵破何福軍執諸將平安等遣使假道於殷殷割使者

耳鼻縱之曰留汝口爲殿下言君臣大義王爲氣沮公主傳

二十一年東川侯胡海子觀選尙主太祖爲觀擇師難其人以命徐宗實中使援他府例置駙馬位中堂南向而布師席於西階上東向宗實手引駙馬位使下然後爲說書

左右大驚相顧以目帝聞而嘉之徐宗實傳

永樂初都指揮款台乘馬過駙馬都尉袁容門容怒其不下錘之幾死成祖聞之賜趙王高燧書曰自洪武來往來駙馬門者未聞令下馬也昔晉王敦爲駙馬縱恣暴橫卒以滅亡汝其以書示容令械辱款台之人送京師容由是

斂戢公主傳

明會要卷四十二

二

宣德三年詔駙馬不務詩書通古今曉忠孝仁義之道必至怠惰驕縱何以保富貴須使之親近儒生先朝駙馬家有學錄可擇端重儒者一人命之教督會典

正德中劉瑾下獄詔廷訊有問者瑾輒指其人附己廷臣無敢詰駙馬都尉蔡震厲聲曰我皇家至戚應不附爾趣獄卒拷掠之瑾乃服罪

世宗入繼駙馬都尉崔元以迎立功封京山侯給誥券禮部言奉迎乃臣子之分遽膺封爵無故事帝曰永樂初年太宗入繼大統駙馬都尉王甯以翊戴功封永春侯何得言無故事科道連章論其不可皆不聽已上公主傳

嘉靖六年始定禮部主事一人專在駙馬府教習禮志

三十三年駙馬都尉鄔景和奉旨直西苑撰立文以不諳
立理辭帝不悅罷其入直已而賚在直諸臣景和與焉景
和辭免且言臣願洗心滌慮効馬革裹尸之報帝怒其怨
訕黜為民公主傳

崇禎十六年二月帝召公侯伯於德政殿言祖制勳臣駙

馬入監讀書習武經弓馬諸臣各有子弟否成國公朱純
臣定國公徐允禎等皆以幼對駙馬都尉鞏永固獨上疏

請肄業大學帝褒答之公主傳

五軍都督府元大都督府

明會要卷四十二

三

太祖丙申下集慶路置樞密院辛丑二月丁丑改為大都

督府以朱文正為大都督節制中外諸軍事參議宋思顏

參軍事四月辛巳朔以李善長兼領大都督府司馬身山集

吳元年更定官制罷大都督不設以左右都督為長官正

一品都督同知從一品都督副使正二品都督僉事從二

品參議正三品以戶部尚書樊思民為之職官志

洪武三年御史袁凱言諸將習兵事恐未悉君臣禮請於

都督府延通經學古之士令諸武臣赴都堂聽講庶得保

族全身之道十月丙辰詔儒臣更直午門為武臣講經史

袁凱傳

九年罷都督副使改參議爲掌判官吏部尙書陳銘爲之
十年升都督僉事爲正二品掌判官爲正三品

職官志

七月以李文忠領大都督府事敕曰大都督府掌天下兵
馬其遷選調遣辨強弱知險易發放有節進退有信防姦
禦侮非止一端朕以機密託之腹心匪第賞功良以都督
天下兵馬職任綦重今府僉事已任左右都督同知特以
爾專行提調府事一應遷選調遣務從爾議然後一同來
奏若府官及大小軍職有不如律者卽便究治有功者奏
聞毋隱

世法錄

十三年改都督府爲中左右前後五軍都督府分領在京

明會要卷四十二

四

各衛所及在外各都司衛所

職官志

二十二年四月丙辰分建五軍斷事司於太平門外

大政記

二十七年正月甲辰上諭五軍都督府曰朕嘗令武臣子
弟演習武藝今天下久安彼年少者惟安享父兄俸祿博
奕遊戲一旦襲職弓矢不諳能爲國家效力乎近揚州衛
指揮使單壽襲其父職帥兵泰州捕寇猝與賊遇遂懼而
走由其不諳習故耳自今武臣子弟年及二十五軍都督
府試其騎射嫺習許襲否則授職止給半俸候三年復試
之中者給全俸不能者謫爲軍著爲令

昭代典別

永樂元年設北京留守行後軍都督府後又分五府稱行

在五軍都督府十八年除行在字在應天者加南京字洪
熙元年復稱行在仍設行後府宣德三年又革正統六年
復除行在字

職官志

宣德初張昇進左都督掌左府事敕諭昇曰卿舅氏至親
日理劇務或以吏欺謾連不問則廢法問則傷恩其罷府
事朝朔望官祿如故稱朕優禮保全之意

外戚傳

初仁宗將還都南京設行後軍都督府及行部凡五府六
部文移申達必經行府行部多重複稽誤宣德三年帝命
公侯伯尙書都御史翰林學士議於是張輔蹇義等言北
京既有府部行府行部宜罷從之

三編

明會要卷四十二

五

五軍都督府掌印缺於見任公侯伯取一人僉書缺於帶
俸公侯伯及在京都指揮在外總兵官推二人

選舉志

舊制都督府遣使於外必領內勘合下都司不敢輒下衛
宣德間軍府寢橫使者挾關文四馳歷諸衛戩軍伍貴州
按察使應履平言勘合之設所以防詐僞今右軍府遣發
至黔者不遵故事小人憑勢橫求詐冒何從省宣宗善其
言都督陳政引罪帝令諸司永守之軍府爲之戢

應履平傳

天順二年五月孫繼宗督五軍營戎務兼掌後軍都督僉
事自景泰以前外戚無典兵者帝見石亨張軌輩以營軍
奪門故使繼宗參之

天順中楊善以禮部尙書改掌左軍都督府成化中王越

以左都御史改掌前軍都督府

已上夢餘錄

正德以來軍職冒濫爲世所輕內之部科外之監軍督撫

疊相彈壓五軍府更如贅疣

兵志

正德十六年令五府及錦衣衛必由都指揮屢著勳猷者

升授

選舉志

嘉靖五年十一月丙午給事中管律言比來五府掌印僉事五軍三千神機等營坐營坐司類以侯伯爲之流官擢用者不過一二以國家兵馬綱領之地坐擁參養驕侈之徒平居無事茫不知兵一遇有警束手無措乞敕所司嚴

明會要卷四十二

六

加簡汰而以諸將官有年力勳績可備緩急之用者當之且都督流官無所倚恃恩之易感威之易行公侯世爵難禡有犯不能盡其法有求必欲盡其恩此祖宗於兵政所以重任都督而不輕授侯伯也章下所司

明政統宗

五府僉書有以都督充者至掌印則必勳臣嘉靖八年令五府掌印官都督有才望者一體推用終不能行都督有三等曰左右都督曰都督同知曰都督僉書是爲世官副都督則流官也

春明夢餘錄

嘉靖二十九年給事中楊允繩請令五軍都督府府軍前衛及錦衣衛堂上官每遇考選軍政之歲各具疏自陳聽

科道官拾遺騰驤四衛及錦衣指揮以下聽兵部考察詔從之著爲令

楊允繩傳

上直衛

元哈喇婁萬戶府

上十二衛錦衣衛旗手衛金吾前衛金吾後衛羽林左衛羽林右衛府軍衛府軍左衛府軍右衛府軍前衛府軍後衛虎賁左衛

洪武中置

上十衛金吾左衛金吾右衛羽林前衛燕山左衛燕山右

衛燕山前衛大興左衛濟陽衛濟川衛通州衛

永樂中置

四衛營騰驤左衛騰驤右衛武驤左衛武驤右衛

宣德中置

已上二十六衛番上宿衛名親軍以護宮禁不隸五都

明實錄卷四十二

七

督府而錦衣衛主巡察緝捕理詔獄以都督都指揮領之蓋特異於諸衛焉

錦衣衛

元拱衛直

太祖甲辰設拱衛司領校尉隸都督府尋

改拱衛指揮使司洪武二年定爲親軍都尉府統中左右

前後五衛軍士而設儀鑾司隸焉十五年罷府及司置錦

衣衛親軍指揮使司鎮撫司理衛中刑名如列衛兼管軍

匠

王圻通考

十年以治錦衣衛者多非法陵虐乃焚刑具出繫

囚送刑部審錄詔內外獄咸歸三法司罷錦衣獄成祖時

復置尋增北鎮撫司專治詔獄而以舊所設爲南鎮撫司

諸衛親軍皆以番直宿衛執戈戟嚴巡警監門禁而錦衣

所掌者乃鹵簿儀仗之事旗手所司者乃旗纛金鼓之物諸衛皆統軍卒而錦衣獨領校尉力士卽周之旅賁虎賁也諸軍皆世卒而府軍獨簽幼軍卽漢之六郡良家子也諸衛正卒一惟其世獨錦衣之任則不必世而以能御座則夾陛而立御輦則扶轅以行出警而入蹕承旨而傳宣皆在所司而詔獄所寄則尤重

錦衣典親軍其後寄以訶察之柄體勢日隆然本非尊官也故雖紀綱門達遂杲之橫肆而綱達不過都指揮僉事杲僅指揮同知而已袁彬自都指揮出僉都督府方晉橫玉正德初高得材緣從父鳳柄司禮傳升右都督終以非

明會要卷四十二

例於五府帶俸錢甯繼踵雖貴盛之極而意猶歉然請以都指揮理事至於陸炳加公孤朱希孝太保兼宮傳而寵斯極矣已上夢餘錄

留守衛元左右阿蘇衛

明初置都鎮撫司總領禁衛隸都督府洪武三年改爲留守衛指揮使司後升爲留守都衛八年復爲留守衛十一年改留守中衛增置留守左右前後四衛專司巡察守衛隸都督府者三十有三留守左衛鎮南衛驍騎右衛龍虎衛藩陽左衛藩陽右衛隸左軍留守右衛武德衛虎賁右衛隸右軍留守中衛神策衛應天衛和陽衛隸中軍留守前衛龍

驤衛豹韜衛

隸前軍

留守後衛鷹揚衛興武衛會州衛富峪

衛寬和衛神武左衛大甯中衛大甯前衛忠義右衛忠義

前衛忠義後衛義勇右衛義勇前衛義勇後衛武城中衛

蔚州左衛

隸後軍

非親軍而不隸都督府者十有五武功中衛武功右衛

故隸工部

永清左衛永清右衛彭城衛長陵衛獻陵衛景陵衛

裕陵衛茂陵衛泰陵衛康陵衛永陵衛昭陵衛

已上職官志

洪武中設錦衣等上十二衛以衛宮禁留守等四十八衛

以衛京城上十二衛爲親軍指揮使司番直宿衛不隸於

都督府永樂中設五府各衛於北京改前北平三衛爲金

明會要卷四十三

九

吾左右衛爲羽林前衛改北平都司爲燕山左右衛爲濟

陽通州衛是爲上十衛與騰驤左右衛武驤左右衛四衛

亦得名親軍其武功中左右衛以匠役隸工部諸陵設衛

不隸都督府亦不稱親軍凡親軍衛得直達兵部其餘衛

分流官卅官土官龔替優給優養所衛都司上之府引奏

送兵部

夢餘錄

景泰中給事中張甯言京衛帶俸武職一衛至二千餘人

通計三萬餘員歲需銀四十八萬米三十六萬並他折俸

物動經百萬耗損國儲莫甚於此而其間多老弱不嫻騎

射之人莫若簡可者補天下都司衛所缺而悉汰其餘議

格不行張甯傳

南京武職

南京五軍都督府分掌南京衛所以達於南京兵部

南京衛指揮使司凡四十有九分隸五都督府者三十有

二留守左衛鎮南衛水軍左衛驍騎右衛龍虎衛龍虎左

衛英武衛龍江右衛藩陽左衛藩陽右衛隸左府留守右衛

虎賁右衛水軍右衛武德衛廣武衛隸右府留守中衛神策

衛廣洋衛廣天衛和陽衛及牧馬千戶所隸中府留守前衛

龍江左衛龍驤衛飛熊衛天策衛豹韜衛豹韜左衛隸前府

留守後衛橫海衛鷹揚衛興武衛江陰衛隸後府親軍指揮

使司十有七金吾前衛金吾後衛金吾左衛金吾右衛羽

明會要卷四十二

十

林左衛羽林右衛羽林前衛府軍衛府軍左衛府軍右衛

府軍後衛虎賁左衛錦衣衛旗手衛江淮衛濟川衛孝陵

衛與左府所屬十衛右府所屬五衛前府所屬七衛後府

所屬五衛並聽中府節制已上職官志

永樂北遷命中府掌事官守備南京節制在南諸衛所兵志

洪熙元年命中官鄭和領下番官軍守備南京於內則與

內官王景宏等協同管事遇外有事則與襄城伯李隆等

商議施行三編

景泰間增設同守備官

萬曆三十一年添設南中軍標營選大教場卒千餘設中

軍參將統練

已上兵志

王府護衛

元內史府典軍司

明初諸王府置護軍府洪武三年置儀衛司五年置親王護衛指揮使司每王府設三護衛衛設左右前後中五所

九年罷護軍府

職官志

十年正月以羽林等衛軍益秦晉燕三府護衛各二千二

百餘人

編三

三編發明曰初秦晉燕三府護衛各一千數百人葉伯巨已謂優以甲兵衛士之盛恐數世之後尾大不掉宜

明會要卷四十一

士

及其未之國之先滅其兵衛云云矣太祖既不用其言又從而加益之蓋以是三府者皆臨邊阨塞欲厚其勢以捍外侮耳於是晉燕二王尤被重寄數命統兵出塞大將皆受節制而怙寵憑強燕藩卒挾以構逆不可謂燕貽之善也

建文元年八月詔削甯王權三護衛

永樂元年六月革代王桂三護衛及其官屬

四年四月削齊王榑官屬護衛

六年正月削岷王榘護衛

十年削遼王植護衛

已上諸王傳

十四年十一月削漢王高煦二護衛

本紀

洪熙元年趙王高燧辭常山左右二護衛宣德二年請還常山中護衛及羣牧所儀衛司官校帝命收其所還護衛而與儀衛司

宣德初韓王松請蠲護衛屯租建邸第許之

七年肅王瞻炤上二護衛

天順初革甯王奠培護衛正德二年奠培孫宸濠賄劉瑾請復護衛許之

正德五年詔削慶王台滋護衛

已上諸王傳

九年甯王宸濠求復護衛給事中徐文溥諫曰曩因甯藩

明會要卷四十二

十一

不靖英廟革其護衛逆瑾亂政重賄謀復瑾既伏誅陛下又革之正欲制以義而安全之耳乃曰驅使乏人夫晏居深邃靡征討之勞安享尊榮無居守之責何所用而乏人且暴行大彰及今止之猶恐不逮顧可縱之加恣假翼於虎乎疏入不聽

徐文溥傳

總兵官

凡天下要害處所專設官統兵鎮戍其總鎮一方者爲鎮守獨鎮一路者爲分守各守一城一堡者爲守備與主將同守一城者爲協守又有提督提調巡視備禦領班備倭等名凡總兵副總兵率以公侯伯都督充之宣德間設山

西陝西二總兵嘉靖間分設廣東廣西貴州湖廣二總兵
爲四改設福建保定副總兵爲總兵又添設浙江總兵萬
厯間又增設於臨洮山海天啟間增設登萊至崇禎益紛
不可紀

職官志
王圻考

明初武事俱寄之都指揮使司後設總兵事權最重先是
公侯伯專征者皆列尙書上自建總督後總兵稟奉約束
卽世爵俱不免庭趨其後漸以流官充總鎮秩位益卑當
督撫到任之初兜鍪執仗叩首而出繼易冠帶肅謁乃加
禮貌焉嘉靖中卽周尙文位三公萬厯間李成梁躋五等
亦循此規不敢踰也

野獲
編

明會要卷四十二

三

洪武二年十月設總兵官

大政
記

四年費聚副安陸侯吳復爲總兵十八年命爲總兵官
七年海上有警吳禎復充總兵官

二十年命藍玉行總兵官事

建文二年命李景隆爲平燕將軍充總兵官陳暉平安爲
左右副總兵馬溥徐真爲左右參將

成祖卽位命何福佩征虜將軍印充總兵官

永樂元年鄭亨充總兵官備宣府

二年王友充總兵官沿海備倭

四年李彬充總兵官備倭海上

七年命邱福佩征虜大將軍印充總兵官王聰霍親爲左
右副將王忠李安爲左右參將

已上見各本傳
霍親舊作火真

洪熙元年二月辛丑頒將軍印於諸邊將初鎮守邊將有
佩將軍印者多係特命謂之挂印將軍至是始頒各鎮將
軍印總兵六人雲南黔國公沐晟征南將軍大同武安侯
鄭亨征西前將軍廣西鎮遠侯顧興祖征蠻將軍遼東武
進伯朱榮征虜前將軍宣府都督譚廣鎮朔將軍甘肅都
督費瓛平羌將軍參將四人交趾榮昌伯陳智都督方正
征夷副將軍甯夏保定伯梁銘都督陳懷征西將軍後設
薊州淮安總兵皆在畿內不得挂印稱將軍

昭代典則系
之正月本紀

明會典卷四十一

七

二月辛丑
茲据之

成化中周璽以右副總兵分守代州兼督偏頭諸關璽以
偏頭去太原遠請改分守爲鎮守又以鎮守不當聽節制
乞易總兵銜從之

劉甯
傳

正德四年固原總兵官曹雄上言故事布按二司及兵備
道臣文移達總兵官者率由都司轉達今邊務亟徵調不
時都司遠在會城往返千里恐誤軍機乞如巡撫大同例
徑呈總兵官便兵部覆如其言旣復受劉瑾屬奏雄鎮守
未佩印宜如各邊例特賜印以重其權乃進雄署都督同
知以延綏總兵官吳江所佩征西將軍印佩之而別鑄靖

虜將軍印子江曹雄傳

十一年尙書王瓊奏陝西延綏甯夏甘肅三邊先年各設總兵官一員其陝西省城並固原地方原無設立宏治十四年邊賊入寇暫設副總兵一員於固原駐劄不久裁革以後或留或革或兩員並設事體不一近年將副總兵趙文暫移河州駐劄原議邊寇甯息另行定奪見今趙文升充總兵官專一固原駐劄鄭卿升副總兵仍在河州今戶部署郎中馬應龍奏稱鄭卿在彼罔恤軍民疾苦窮極剝削等情合無將鄭卿革回原衛帶俸其原任協守副總兵員缺不必推補疏入從之明臣奏議

明會要卷四十一

五

時倭亂未靖漕運總督王廷建議以江南屬鎮守總兵官專駐吳淞江北屬分守副總兵專駐狼山遂爲定制王廷嘉靖時仇鸞奏革薊州總兵官李鳳鳴大同總兵官徐珏任而薦京營副將成勳代鳳鳴密雲副將徐仁代理旨從中下兵部侍郎王邦瑞言朝廷易置將帥必采之公卿斷自宸衷所以慎防杜漸示臣下不敢專也且京營大將與列鎮不相統攝何緣京營乃黜陟各鎮今曲徇鸞請臣恐九邊將帥悉奔走託附非國之福也帝不悅下旨譙讓王邦

瑞傳

三十七年巡撫都御史李遂奏准揚地方濱臨江海而狼

山一帶尤爲適中要害地請添設副總兵一員駐劄通州操練兵馬有警移駐狼山與金山副總兵彼此會哨出洋夾攻其通州參將移駐鹽城鹽城把總移駐大河口各赴改擬地方就便行事疏入從之

明臣奏議

四十一年三月從總督浙直胡宗憲請於南贛設副總兵官以吉安守備屬之於建昌撫州設參將以鉛山守備屬之復設游擊於南昌省城而以鄱陽守備改爲參將令專練舟師控制九江

三編

四十二年福建巡撫譚綸奏請以戚繼光充總兵官鎮守福興九郡一州其三路參將悉改爲守備卽以繼光部下

明史卷四十二

六

偏裨曉暢兵事屢立戰功者充補

同上

四十五年九月給事中歐陽一敬言廣西總兵官原以流官都督爲之後改用勳臣與提督同駐梧州重爲地方煩擾今宜召恭順侯吳繼爵還京仍選用流官移鎮廣西會城部議請設兩廣總兵官以俞大猷鎮廣西湯克寬鎮廣

東

通紀

隆慶元年奏准遼東總兵官以隆冬之時移鎮遼陽以援海疆瀋陽冰解回軍廣甯以防土蠻

二年兵部覆奏甯波旣設海道副使兵備事可以兼攝其紹興兵備可省令甯紹台分守參議移駐紹興台州兵備

僉事兼分巡三府至於甯紹台參將各防禦信地仍聽總兵官居中調理上從之

已上王圻考

是年五月以戚繼光總理薊州昌平保定三鎮練兵事至鎮上疏言臣官為勅設諸將視為綴疣安從展布下兵部議薊鎮既有總兵又設總理事權分諸將多觀望宜召還總兵郭琥專任繼光從之乃命繼光以總兵鎮守薊州永平山海諸處

繼光傳

先是陝西止設四鎮萬厯中西甯多警增設臨洮總兵官遂為五鎮

李懷信傳

崇禎元年袁崇煥督師薊遼欲更置大將上言臣昔為巡

明會要卷四十一

七

撫定議關外止設一總兵其時魏忠賢竊柄崔呈秀欲用其私黨增設三四人以致權勢相衡臂指不運乃止留甯遠及前鋒二人而臂指之不運猶故也臣以為甯遠一路斷宜併歸前鋒總兵駐關內者挂平遼將軍印轄山石二路而以前屯隸之駐關外者挂征遼將軍印轄甯遠一路而以錦州隸之

何可綱傳

十一年二月河南巡按御史張任學見羣盜縱橫自請易武階為國平賊上壯之下吏兵二部及都察院議僉以文吏無改武職者請仍以監軍御史兼總兵事上不從命署都督僉事為河南總兵官

任學傳

十五年禮部侍郎蔣德璟言祖制三協止一督一撫一總兵今增二督三撫六總兵又設副將數十人權不統一何以制勝德璟傳

大將軍

明將鎮守各邊挂印稱將軍其在薊州淮安鎮守漕運總兵以畿內故不得挂印稱將軍有大征討遣總兵則挂平賊將軍平胡將軍平虜將軍征夷將軍征虜將軍討賊將軍或大將軍或前將軍副將軍印行事事已納印王圻考明初命徐達為大將軍授節鉞訖出勒所部建牙鳴鼓角正行列擎節鉞鼓吹前導百官以次送其時大將軍任重

明會要卷四十二

大

職專儀亦極盛他如常遇春等不過稱副將軍焉後成國公朱能征安南亦為大將軍凡有大征討率以五府都督及公侯伯充大將軍續通典文彬按太祖本紀拜大將軍者徐達後有馮勝藍玉建文時有李景隆耿炳文而通典止載朱能於永樂四年七月為征夷將軍十月卒證之成祖紀及能本傳皆未稱大將軍征虜大將軍 徐達吳元年洪武三年 馮勝二十 藍玉上 耿炳文建文 李景隆上 邱福永樂七年 顧興祖十一月 楊洪景泰元年

石亨同 朱永成化十年

靖虜大將軍 朱暉宏治十三年

平虜大將軍 柳溥天順初見本傳 杭雄嘉靖三年 仇

鸞二十九年

都護大將軍 郭勛 嘉靖十八年世宗幸承天以勛爲之弇山集

將軍

征南將軍 湯和 吳元年 胡廷瑞 同上 傅友德 吳元十四年洪

二十一年 廖永忠 洪武元年 周德興 三年 鄧愈 五年 鄧鎮 十六年

年 楊文 二十八年 顧成 二十九年 韓觀 永樂傳劉儁傳 沐晟 洪

元年正統三年 沐昂 四年 陳懋 正統十年

征戍將軍 鄧愈 洪武元年

靖海將軍 郭英 洪武十年

征西將軍 湯和 洪武四年 馮勝 五年 鄧愈 十年 沐英 一

明實錄卷四十二

九

年 耿炳文 三十年 梁銘 洪熙元年

平羌將軍 丁鈺 洪武十年 何福 二十年 李景隆 二十年 甯

正同上 齊讓 三十年 宋晟 初 費瓚 洪熙元年 陳懋 英宗

初 征虜將軍 湯和 洪武十年 傅友德 二十年 楊文 三十年

何福 惠帝初 張輔 永樂七年 任禮 正統二年

平燕將軍 盛庸 建文二年

鎮朔將軍 譚廣 洪熙見本傳弇山集作大將軍 周玉 成化 莊鑑 宏治

征夷將軍 朱能 永樂四年 張輔 同上 沐晟 五年 李彬 十五年

王通 宣德元年 顏彪 天順五年 李瑾 成化三年

平蠻將軍 蔣貴 正統六年 宮聚 十三年 王驥 十四年 梁

瑤 景泰元年 陳銳 成化初年 余大猷 嘉靖

平夷將軍 石彪 天順二年 王越 十六年

平胡將軍 朱永 成化二年 趙輔 八年

平虜將軍 楊信 成化二年 朱永 六年 劉聚

同上

靖虜將軍 朱永 成化十五年 陳銳 宏治三年

平賊將軍 時源 正德七年

征蠻將軍 王瑾 嘉靖初年 歐信 順天

前將軍

明會要卷四十二

三

征虜前將軍 傅友德 洪武二十三年 沐春 三十年 朱榮 洪熙

巫凱 宣德

征西前將軍 鄭亨 洪熙

前將軍 宋琥 永樂八年

副將軍

征虜副將軍 常遇春 吳元年 李文忠馮勝湯和鄧愈 洪武

三年李文忠馮勝為左右副將軍鄧愈湯和為左右副將軍 前副將軍顧時 四年

左副將軍李文忠 五年 湯和傅友德 十四年 周德興 八年

年 傅友德藍玉 二十年 唐勝宗郭英 同上 王弼郭英

二十年 李堅甯忠 元年 王聰霍親 永樂七年 張輔 九年

柳升宣德元年

征南副將軍 吳禎何文輝廖永忠皆吳元年 朱亮祖洪武元年

周德興吳良五年 藍玉沐英十四年 沐英陳桓二十一年

韓觀宋晟二十八年

征西副將軍 周德興廖永忠洪武四年 沐英十年 郭英十二年

平燕副將軍 陳暉平安建文二年

征夷副將軍 左右副將軍沐晟張輔永樂四年 韓觀九年

仇鸞嘉靖十六年 柳珣十九年

平羌副將軍 蔣貴趙安正統二年

明會要卷四十二

三

平蠻副將軍 李安劉聚正統六年

平虜副將軍 劉玉成化四年

威武副將軍 朱泰正德十年

偏將軍

李文忠洪武二年以偏將軍從右副將軍常遇春出塞

湯和洪武元年拜偏將軍從大將軍西征

王志洪武中用兵西南皆以偏將軍從

列將軍

游擊將軍總兵以下官

佐擊將軍唯京營有之

驃騎將軍 永樂中薛祿冀中顧成朱榮等

神機將軍 永樂八年侯鏞陳賢等

鷹揚將軍 永樂八年金玉等

輕車將軍 永樂八年李文等

大漢將軍 錦衣衛 尼從官屬

紅盔將軍 永樂中置 備宿衛

明甲將軍 同上

其他金吾龍虎及鎮國定國奉國昭勇昭毅昭武懷遠定遠明威宣威廣威宣武顯武信武武德武節武略武毅各將軍皆武臣散階無所職掌 通典

明會要卷四十一

留守司 元上都 留守司

洪武十四年九月丁酉置中都留守司統鳳陽等八衛防

護皇陵設留守一人左右副留守各一人嘉靖十八年改

荊州左衛為顯陵衛置興都留守司統顯陵承天二衛防

護顯陵設官如中都 職官志

都指揮使司 元宣慰司 都元帥府

洪武三年升杭州江西燕山青州四衛為都指揮使司以

徐司馬濮英為都指揮使復置河南西安太原武昌四都

指揮使司都司之名自此始 明史 稟

初太祖置各都衛指揮使司節制方面八年詔改為都指

揮使司凡都司十有三北平陝西山西浙江江西山東四
川福建湖廣廣東廣西遼東河南行都司三西安大同建

甯三編

九年命都督府擇公侯都督及各衛指揮嫡長次子才可
試用者爲散騎參侍舍人隸都督府佩弓刀充宿衛或署
各衛所司聽省府臺部差遣才品超卓者不次用之史稿
十五年置貴州雲南二都指揮使司

二十年九月置大甯都指揮使司明年改爲北平行都司
已上三編

明會要卷四十一

三

統領所部兵馬除軍民詞訟事重者許會問外其餘不得
干預時有廣西都指揮耿良造譙樓令有司起發科斂兵
丁財物青州衛造軍器亦擅斂民財上聞之詔申明禁例
凡在外都司衛所遇有造作千戶所移之衛衛達指揮司
司達五軍都督府奏准方許之其物料並自官給毋得擅
取於民間詞訟雖事涉軍務者均歸有司申理毋得干
預並著爲令昭代典則

二十五年十二月丙子命各都指揮使以兵馬糧儲之數

及關隘衝要山川險易道里遠近悉繪圖以聞大政記

三十年定武官軍役之制指揮同知僉事四千戶三百戶

鎮撫二皆取正軍三日一番上下直歸伍操練衛所直廳
六守門二守監四守庫一皆老軍充役歲一更兵志

永樂元年三月改北平行都司為大甯都司徙保定二編

計天下都司凡十有六十三省都司外有遼東大甯萬全

三都司行都司凡五陝西山西福建四川湖廣職官志

宣德八年五月禁各都司泛濫差遣大政記

正德二年總制三邊楊一清奏參將分疆畫地各守一隅

所謂守將游擊隨敵聲勢往來策應所謂戰將二者未有

不相通而目前之用則先其所急竊見分守延綏東路右

參將時源慣經戰陣驍勇著聞今分守一方雖未嘗廢事

明會要卷四十二

使當游擊之任衝鋒破敵是其所長延綏游擊將軍戴欽

才識疏通曉暢邊情今為游擊非無可取若居分守其所

建立必有過人况延綏慣戰精銳之兵東西應援必得驍

將領之而神木孤山一帶營堡密邇河套敵人畏冬首先

窺伺分守得人有不戰自屈之勢乞將時源改充游擊將

軍戴欽改任分守參將易地而居各當其才戰守之寄兩

有所託明臣奏議

衛指揮使司所附元諸路有萬戶府千戶所百戶所

外衛各統於都司行都司或留守司率世官或有流官設

官如京衛凡襲替升授優給優養報都指揮使司達所隸

都督府移兵部每歲撫按察其賢否五歲一考選軍政廢置之

洪武七年八月申定衛所之制先是內外衛所凡一衛統十千戶一千戶統十百戶百戶領總旗二總旗領小旗五十小旗領軍十至是重定其制每衛設前後中左右五千戶所大率以五千六百人為一衛一千一百二十人為一千戶所一百一十二人為一百戶所每百戶所設總旗二人小旗十人

二十年命衛所各立掌印僉書專職理事

二十三年設軍民指揮使司軍民千戶所計天下內外衛

明會要卷四十二

五

凡五百四十有七所凡二千五百九十有三自衛指揮以下其官多世襲其軍士亦父子相繼為一代定制已上職官志

宣德五年從平江伯陳瑄言以衛官職漕運東南之卒由

是困兵志

土官元宣慰司多在內地其在遠服則有招討安撫宣撫等使

洪武七年西南諸蠻夷朝貢多因元官授之稍與約束定

征徭差發之法漸為宣慰司者十一為招討司者一為宣

撫司者十為安撫司者十九為長官司者百七十有三其

府州縣佐貳屬官或土或流皆因其俗使之又有番夷都

指揮使司三衛指揮使司三百八十五宣慰司三招討司

六萬戶府四千戶所四十一站七地面七寨一並以附寨

番夷官其地

職官志

永樂二年十月己巳製信符金字紅牌給雲南諸夷其各

土司設經歷都事吏目掌文書

大政記

宣德二年帝以所授諸司宜有等殺兵部議以四百戶以上者設長官司四百戶以下者設蠻夷官司元土官子孫量授以職從所招官司管屬皆從之令三年一朝貢如故

事土司傳

土官升府部大臣洪武土官宣慰使鄭彥文升工部左侍郎永樂交州府知府阮均為刑部左侍郎建昌府知府同

明會要卷四十二

美

彥翊濱州府同知黎思凱為刑部右侍郎景泰時廣西都

指揮同知黃玠為前軍都督府同知

夢餘錄

雲南諸司吏舊不得給由父滿子代宏治初巡按御史劉丙請如例考入官流戍愈發必經兵部多淹延至死丙請屬之撫按土官無後者請錄其弟姪勿令妻妾冒冠服俱

著為例

劉丙傳

宏治二年十月令土官先報應襲子弟守臣審覈書冊

政記

四年雲南布政使韓文以土官襲代旁支賄奪土吏滿兩考者例不赴京於境內轉相參補於是釐正宿弊始立定

法奏行之

明政統宗

十七年正月貴州撫臣劉洪乞賜土官漢姓帝命隨土俗所稱不必徧賜

大政記

廣西土官承襲長吏率要賄不時奏以故諸酋怨叛太平知府胡世甯令生子卽聞府應世及者年十歲以上朔望

謁府父兄有故按籍請官於朝土官大悅

胡世甯傳

嘉靖九年以土司府州縣等官隸驗封宣慰等官隸武選隸驗封者布政司領之隸武選者都指揮領之

土司傳

貴州土官以百數水西安氏最大而土地戶口貢賦之數無籍可稽巡按御史楊鶴乃檄宣慰安位盡著之籍并首

明會要卷四十二

三

領目把主名承襲源委悉列上有司自是簿牒始明奸弊

易覈

楊鶴傳

